



TAPAK 10

Ni Tir aküm nungbo Nicolas Ato Kilonser shimtsü:Le Pen



TAPAK 8

Bieber agizüksü asoshi Jacqueline renemshir

VOL. XIV NO. 190 (ADOK 190)

DIMAPUR

SUNDAY

APRIL 30, 2017

5.00

GST ajanga rongsenkettsüng jenjang ajungkettsü: Pankaj Kumar

Kohima, April 29 (TYO): Nagaland nung Goods and Services Tax (GST) benokba ajanga tajangzüik angutsü kechiyong saru balala ajak ka küma lokteptsü, ta Nagaland Chief Secretary Pankaj Kumar-i tanü ashi.

Alima nung rongsenren tsütsü India jenjang tasembuba nung lir, ajisüaka asen linük nung technology peria maliba ajanga asenoki tanga linüktem memeneper. GST ajanga asen linük aser state rongsenren tsütsü tejakleni aotsü imlar, ta Pankaj Kumar-isa shisem.

GST benokba ajanga Central Sales Tax (CST) densema sales taxes kanga tezüpa akümtsü, ta GST awareness campaign nung jembidang Nagaland Chief Secretary-i metetdaksü.

Iba sentong ya tanü Central Excise, Custom & Service Tax aser Nagaland Taxes Department tem külemi APO Hall Kohima nung ayongzüka agi.

Nagaland ya alizüka agiba state ka lir aser GST ajanga asenok mesükba state tem kanga ajangzüüksü, kechiyong direct benefit transfer ajanga asen state atema saru lemzükbaji indangindanga asen senpongi

aitsü, ta Pankaj-isa metetdaksü. State nung tang teinyakdak saru dak sendakba inyakyim ya GST ajanga tajungba kümdaksütsü aser iba ya ajanga state nung temelenshi tulu adoktsü, ta paisa shisem.

Sentong nung Chief Commissioner, Central Excise, Custom & Service Tax, Shilling Zone, SK Panda-ia o jembidang, GST saru agütsürtemi tesem aika nung saru agütsütsü meleni saru ka dang agütsütsü, ta ashi.

GST ya angatetsü asoshi kanga dang tezüpa lir, anungji saru agütsürtemi tangar teyari balaka menüngdaksü. GST indang inyakinji internet nung amendaker inyaksü anungji iba nung tim masüba mapa meinyaktetsü aser GST Network ajanga saru dak sendakba mapa ajak inyaktetsü, ta SK Panda-isa metetdaksü.

Commissioner of Taxes, Nagaland, Asangba Chuba Ao-ia GST nung tajangzüik keta alibattem metetdaksüdag, "iba ya ajanga saru onsara saruba aser kechisarena ajak nung jenjang ajema kümdaksütsü," ta ashi.

Iba sentong nung shishilembar, contractor, hotel kibur aser tangartem aika arua aden.

Vice president-ji agütsüra inyaksü mulunga lir: Dr. S.C Jamir



Dr. SC Jamir Mokochung tonger külen pa nem tetushi agütsüba mapang agiba noksa yangi angur. (Mokochung April 29, 2017)

Mokochung, April 29 (TYO): India Vice President inyaksü maangka agütsüra inyaksü mulunga lir, saka pai iba menden atema shinga danga asüngdanga mali, ta Odisha Governor Dr. S.C Jamir Mokochung tonger külen par kidang iba osangbeneri jembidang ashi.

"Ni vice president menden atema shinga danga masüngdang saka agiang ta süra agitsü," ta iba osangbeneri asüngdanga ka langzüdag metetdaksü.

Iba osangbeneri pa dang

Nagaland tia indang asüngdangdang, "tang Nagaland-ji ajak lir ama, saka shinga mali ta asüba tia ka nung lir", ta pai temulung shiranga ashi. "Inyakyim (system) ajak lemtamatadokogo, yimdena lishitsüng nung asong ama kümogo", ta paisa shisem.

Ya kechiba ta süra, "bureaucracy akhi ama tazüokba mali, akhi ama nendaka inyakba mangur", ibaji kechiba süra "yimden lenisüba tsütsü (tila nungi tulu tashi) nüburtemi

timtem agütsür aser parnok nem bilemdangtsü mapang magütsür", ta pai ashi. "item ajakji election inyakyim tai ajanga lir", ta paisa shisem.

"Onok mapang nüburtemi yimden asoshi vote agütsü, saka tanübo nüburtemi pei vote sen yong yoka achir", ta ashi. "Vote ya kanga senti lir, iba ajanga linük aser tarutsü alima yanglur, saka asenoki ibai shishilembadok nung govt-ji shishilembatsüsa akümer", ta kuli kar ashi. "Metsüjang kechi prokdir süngjanga ibaji dang adoker, anungji, shinga aitsütsü makok, saka ibai asenok tai lir", ta paisa shisem.

Iba osangbenerisa Nagaland ULB election dak sentakba indang metetnüa asüngdangdang, "Naga nunger mapa ajak mangmanga dang inyaker, lenmangbo lir sürnung mejembiteper aser jembibajia mejembi ama akümba agi tatembang kati marur", ta langzü.

Paisa iba dak sentakba nung ashidang, longkak aitba toa tajangzüik kecha mangur, iba süleno kecha ola mali kümogo, joko aniadokogo südi. "Iba sülenji kechi inyaksüla ta asübaji alitsüla", ta paisa shisem.

(Maneni tapak 11 nung...)

Nagaland nung World Veterinary Day amung

Kohima, April 29 (TYO): Alima den külemi Nagaland nung tanü 'World Veterinary Day' mungogo. Iba anogomung ya Nagaland State Veterinary Council (NSVC)-i Capital Convention Centre nung ayongzüka agi.

Taküm asoshi omenji "Antimicrobial Resistance-From Awareness to Action" lir aser Animal Husbandry & Veterinary Services Parliamentary Secretary, S. Chuba Longkumer-i tongti tesemdang o jembidang, "linük rongsenkettsüng ainba nung veterinarian temi shilem tulu agir, kechiyong India nunger aluyimbaren nung animal husbandry ajanga tongti shilem lir" ta ashi.

"Veterinarian temi shiruru temang anepaluba ajanga meimchirtem temang tajungba kümdaksür, kechiyong meimchir dak atemba tashidak aika shirurutem ajanga adokba lir. Küm shia menatepba tashidak tasen pungu shi adokba nungi asembo shirurutem dak sendaka aliba puteter" ta S. Chuba-isa ashi.

"Anungji, veterinarian temi bendanga agütsütsüla aser kanga dang nendaka mapa inyaksü. Veterinarian temi tanü-asüng technology metettsüla aser shirurutemi timi anepalutsüla" ta paisa ayongzüik.

Sentong nung tetushi süa jaokerji DAN & NBRM Chairman, Dr. Longriniken liasü aser paia o jembidang, veterinary mapa inyakba nung tenendak, ochishiba, tasü aitba, taremzüik, aser merangba nungdaker, ta ashi.

Dr. Longriniken-i pa veterinary doctor ka ama inyakba bilemteta jembidang, iba mapa inyakdang kanga anibelem aser khenkenbo tezü atanger saka tatem nungbo sempet angur, ta ashi.

Paisa veterinarian tem dang state indang rongsenkettsüng jenjang ajungkettsü atema inyaksü aser professional ka ama sorkar mapa nung dang merangloki peii akokba inyaksü ayongzüik.

(Maneni tapak 11 nung...)

GU-i Tasile N. Zeliang nem Degree agütsüogo



Tasile N. Zeliang Doctor of Philosophy degree agütsüba angur.

Dimapur, April 29 (TYO): Gauhati University-i Nagaland nungi Tasile N. Zeliang nem Doctor of Philosophy Honoris Causa degree agütsüogo.

Tasile N. Zeliang-i Nagaland nung education, sports aser social service nung shilem tulu agia mapa inyakba ajiteta Gauhati University-i la nem honorary degree agütsü.

La indang 'Scroll of Honour' nung, "Nagaland kübok Peren nungi Tasile N. Zeliang ya nüjiso

atema rarar ka jala lir. Lai tesayur ka ama la taküm bendanga agüja tenzüik aser lar oshi nung kaket aika zülüogo. Lai sempet aika agizükogo aser item rongnung Ojoswani Yuwak Alankar (2011), New Art Payer Award (2015) aser The Best Citizens of India Award (2017) tem dena lir" ta zülüa lir.

Gauhati University 26 buba Convocation nung Assam Angh aser Gauhati University Chancellor, Banwarilal Purohit-i

Tasile nem Degree agütsü.

Nagaland nungi Tasile N. Zeliang aser Arunachal Pradesh nungi Nabam Tata nati Doctor of Philosophy Honoris Causa degree tem anguba atema Nagaland aser Arunachal Pradesh, Angh, P.B Acharya-i tena nem tenüngsang agütsü.

Loktiliba aser linük asoshi mapa tajung inyakertemji University temi ajiteta tenüngsang agütsütsüla, ta Angh-isa metetdaksüogo.

Iba ama degree agütsüba ajanga kijatemi tali nendaka mapa inyaksü aser ibaji ajanga sobaliba wazüka ayutsü, tzü-mopung kümzüka ayutsü, loktiliba nung azükaru alitsü aser tetsür-tebur tashi aitsü, ta paisa shisem.

P.B. Acharya ya taoba mapang Assam Angh aser Gauhati University nung Chancellor inyaker aser pai Tasile N. Zeliang-i education, sports aser social service dak sendakba mapa tajung inyaker ajiteta, la nem degree agütsütsü atema tenüng benoka liasü.

METONGSHITSÜR :

Tir Yimym April 29, 2017 adok mezüng tapak nung "Angami nunger Moatsü benjung nung shilem agitsü," ta sangdongba osang tanabuba paragraph nung "Taküm Aor Moatsü benjongmung nung Angami tzükong pezü nungi teshimtet nübo 100..." ta alibaji "teshimtet nübo 1000 (meyirijang ka)" ta metongshitsür."

Manipur nung bomb 2 apok; Yimdaklir 2 kahset

Imphal, April 29 (Agencies): Honibarnep Manipur nung tanep 7:00 ako meta telungpurtemi Border Security Force (BSF) telok ka bomb amshia amak saka iba lendong nung tasüba mesüra yiruba

maliasü. mejangjatetba telungpurtemi Imphal east district kübok Nongren yimtsüng nung BSF camp ka anasa bomb

pokdaksü. Iba lendong atalokba sülen state aser central force temi telungpurtem aputsü atema mita aotsü tenzükogo.

(Maneni tapak 2 nung...)

Veterinary Day nungtem nung Dog Show ka kaogo



April 29, 2017 nü Capital Convention Centre, Secretariat Plaza, Kohima nung World Veterinary Day anogomung nungtem nung ayongba, dog show sentong nung MLA, Dr. Niekiesalie Nicky Kire-i jembiba noksa nung agur. (Kohima, April 29, 2017).

Kohima, April 29 (TYO): April 29, 2017 nü Capital Convention Centre, Secretariat Plaza, Kohima nung World Veterinary Day anogomung nungtem nung dog show ka kaogo aser iba sentong nung tongti tesemdangerji MLA, Dr. Niekiesalie Nicky Kire liasü. Iba sentong nung jembidang Dr. Nicky Kire-i, "Naga nung laktii tajungtiba dang meimer aser tasen-tasen sapur, iba den külemi azü tapu balala metsür Naga nung aika lir, ta metetdaksü.

Pai ashiba agi, ano azü jenjang tasak alirtema lir, saka azütemji anepalu masür.

"Azü ka kibur akumbaji tatabang masü, saka iba sülen asenoki koma anepalur, ibaji tongtibang. Azüji nisung tembar tajungtiba aser dog show nung parnok züi shilem agiba ngur kiburtem pelatsü," ta paisa ashi.

Okila jembidang College of

Veterinary Science & Animal Husbandry CAU Jalukie Dean, Dr. Captain G.D.J Rao-i, nisung ajaki azü aginer, saka ajaki anepalutetsü asü, ta ashi.

Paisa, azütem tazüokba nung anitetsü atema training agütsütsüla, iba den külemi mapang shia vaccine agütsütsüla, kei-mozü agütsütsüla aser temang tendangtsütsüla, ta ashi.

Iba sentong ya NSVC Tir, Dr. I.P. Khala leniba nung agi aser sentong nungsa Dog squad, DEF, Kohima-i shilem agia liasü.

Dog show ya telemsa ana-

Mixed Breed aser Pure Breed nung tendanga liasü. Iba tetoktepba nung azü Pure Breeds 10 aser Mixed Breeds 5-i shilem agi.

Pure Breed takokertem nem certificates den senpet sen 10000, 7000 aser 5000 agütsü aser Mixed Breed category nung takokertem nem certificates den senpet 7000, 5000 aser 3000 agütsü.

Dog Show nung tetendangerterji- Dr. Doreen Peseyie (Tongti tetendanger), Dr. Michael Imti Imchen aser Dr. Sungkum Jamir nung liasü.

Pure Breed takokertem:

- 1st - Gifty (Cocker Spaniel) kibur- Meren Walling
- 1st Runners up- Midnight (Dalmatian) kibur- Limatila
- 2nd Runners up- Shiro (German Shepherd) kibur- Angulie

Mixed Breed takokertem:

- 1st - Hunter kibur- Adizo Khezhie
- 1st Runners up- Tiny kibur- Apokla
- 2nd Runners up- Brownny kibur- Aneipele Dianee

Zunheboto District hospital nung Operation Theatre Complex semzüksü



April 28, 2017 nü Health & Family Welfare Minister, P. Longon-i Hezukhu Memorial District Hospital, Zunheboto nung Operation Theatre semzüksüba noksa nung agur.

Zunheboto, April 29 (TYO): April 28, 2017 nü Health & Family Welfare Minister, P. Longon-i Hezukhu Memorial District Hospital, Zunheboto nung Operation Theatre Complex ka semzüksüogo.

Iba sentong nung jembidang Minister-i, pa küm asem Health

& Family Welfare Minister in-charge inyakdang pai hospital inyakyim aser tia rebrandangtsü atema district hospital 11 prongla semdangogo, ta metetdaksü.

Pai ashiba agi, infrastructure aser manpower dak sentakba nung state nung hospital tamajungtiba rongnung

Zunheboto district hospital densema liasü.

Minister-isa, building tasen yanglutsü atema NRHM-i senotsü agütsüba Forward Linkage Scheme nung Zunheboto district hospital-a züngsemtsü, ta metetdaksü.

Jail, ST & NKVIB Parliamentary Secretary, Hukavi Zhimomi-ia Minister-i bilemja inyakba atema pelaba metetdaksüba den külemi pai, district hospital building tasen ka yanglutsü atema Sumi nungeri pa dak tamang akar, ta ashi.

Paisa, tanga aliba building ya 1960s mapang yanglu, aser iba ya joko yanglushitsüsa masü, ta ashi.

Sumi Hoho Tir, Hekishe-ia Minister nem temepishiba shidi ka agüja liasü.

Iba sentong ya Medical Superintendent, Dr. Kheshito Zhimo leniba nung agi aser CMO, Dr. Hokishe-i tepela anküp o jembia liasü.

Manipur nung bomb 2 apok; Yimdaklir... (TAPAK 1 NUNGI...)

Ano, tanü Churachandpur district kübok Behang boundary pillar anasa Silshi yimtsüng nung bomb ka apok.

Iba lendong nunga tasüba mesüra yiruba kecha maliasü aser sepai talila mapa lemzüksüogo, ta police-i

metetdaksü.

Maneni, tanü Churachandpur district kübok international border anasa telungpurtemi sepaitem amak aser idangji khatepdang yimdaklir ana khaset.

Telungpurtemi Behang

yimtsüng nungi mapa inyaker pezü pua anir ao. Sepaitemji tzü abenba gari ka meiner aodang telungpurtemi parnok len tom nung amak. Telungpur o sepai tsüngda khatepdang yimdaklir ana tiyong nung lia khaset, ta police-i metetdaksü.

Toshimanen Ozukum-i Addl. Director Municipal Affairs mapa agizükogo

Kohima, April 29 (TYO): Dr. Toshimanen Ozukum-i April 6, 2017 nungi Additional Director & HoD Municipal Affairs Department office mapa agizükogo, anungji DO/UDO shiditem aser tanga official

tongtepratep ajak Additional Director & HoD Directorate of Municipal Affairs, below AG office, Kohima ajanga office mesüra nija nungdak atema tongtepratepsü sangdonger, ta ketdangsertemi metetdaksü.

CTN nung screening camp kaogo

Changtongya (Mokokchung), April 29 (TYO): Health and Family Welfare department, Nagaland kübok April 28, 2017 nü Community Health Centre Changtongya nung National Programme for Prevention and Control of Deafness (NPPCD) kübok Hearing Impairment Screening Camp ka katsüogo, ta ketdangser osang ka ajanga

metetdaksü. Dr. Imkongliba Memorial District Hospital Mokokchung nungi Dr. Theja Chase (ENT Specialist) leniba nung Wb. Chinglem Yumnam (Audtometrist) aser Wb. Mayang (Pharmacist) nungeri iba camp katsü, aser iba camp nung tsürabur 86 temang tendangtsü aser parnok 32 hearing test agitsü.



April 29, 2017 nü Meluri nung Miiluo Shefiiri Kiigharii Silver Jubilee mung nung MLA, Azo nem sempet agütsüba noksa nung agur.

DDLSA, SAKHI-i Legal awareness sentong ka katsü

Dimapur, April 29 (TYO): April 29, 2017 nü Lotha Hoho-Ki, Dimapur nung Dimapur District Legal Services Authority (DDLSA) den SAKHI-One Stop Centre (OSC) senteper Lotha Elo Ekhung atema anogo ka Legal awareness sentong katsüogo.

Okila jembidang Principal District aser Session Judge & Chairman, DDLSA, GH Ramlia-i lokti nung tajemzükba tia nung alirtem atema item ama programme katsütsüji kanga tongtibang, ta metetdaksü.

Ramlia-isa, lokti nung tetsürtemi tongtibang shilem ka agir, ibayongji tetsürtemi parnok temetentem meteta alitsüla, koba ajanga parnoka teburtem den liromema akumtsü, ta ashi.

Ano Case Worker, SAKHI-OSC, Bovili K Chishi-ia OSC temzüngtem aser teinyaktsü shilemtem onük nung jembia liasü.

Lai ashiba agi, tetsürtem anema inyakba mapa balala ajanga takoksa anguba tetsürtem temang aser shisatsü anepalutsü atema Centre-i inyaker.

Anti-human trafficking/

NALSA Schemes indang metetdaksüdag Panel Lawyer DDLSA, Moatila Aoi, Victims of Trafficking and Commercial Sexual Exploitation Scheme, 2015 tongtibangba nükjidongji nisung shibelenba aser azüabongba tsütsü tim mesüi inyakba anema legal teyari agütsütsü atema lir, aser iba scheme yagi tanur ajak, aiür chanutem aser tetsür ajak ayimjemer, ta metetdaksü.

Kasa sentong nung DDLSA nungi Panel Lawyers-Zuchumbeni, Moatila Ao, Dzuvinu Chadi, Rokovitsu aser Zacharia Tetseo nungeria Women Right/ Domestic Violence Act, Consumer Protection Act, RTI aser Lok Adalat/ welfare schemes onüktem nung jembia liasü.

Shisa lemsatepdang CJM aser Secretary, DDLSA, Ajongba Imchen-i shilem agirtemi metetnüa asüngdangbatem langzüa liasü.

Tanü sentong nung Lotha Elo Ekhung Tir, Sungsabeni-i lokti pelaa agizük.

Iba sentong ya panel lawyer, Sentimenla leniba nung agia liasü.



Agartala, April 29, 2017: Honibarnü Agartala nung nisungtemi Akshaya Tritya benjung atema sentioset ayokba dokan ka nung sentioset balala alitsü repringba noksa nung angur.

Gauhati University-i honorary degrees agütsü

Guwahati, April 29 (Agencies): Hokolbarnü Gauhati University nung 26 buba convocation nung Bharat Ratna angur CNR Rao aser litterateur Nilamani Phookan na nem DLitt (Honoris Causa) degree agütsüogo.

Guwahati University-isa Satriya artist Hem Chandra Goswami, painter Jiten Hazarika, social activist, lyricist & film maker Nabam Tata, aser sports personality Tasile N Zeliang nung nem honorary doctorate degree tem agütsüogo.

National Institutional Ranking Framework (NIRF) tesüsuba nung Guwahati University-i Indian universities rongnung 27 buba menden tongtetogo.

Iba dak sendakba nung GU chancellor aser state Angh, Banwarilal Purohit-i university dang temaba jenjang 10 buba

atongtsü atema merangtsü ayongzüik.

"Asenoki India nung university tajungtiba 10 rongnung züngsemsü merangtsüla. Ibaji asen alizüing asütsü, saka iba alizüing atongtsü atema asenoki bendanga agütsütsüla, meranga inyaktsüla aser temulung agütsütsüla" ta Banwarilal-i ashi.

Guwahati University-i infrastructure, faculty development aser curriculum nung temulung agütsütsüla aser international partnerships maparen tajungba inyaktsüla, ta Angh-isa ayongzüik.

Sentong nung scientist CNR Rao-ia o jembidang, science indang tamendakdak akangshitsü indang ashi.

Asenoki higher education sector nung senotsü talila lemkütsütsüla, saka ano classroom materials tajungba

agütsütsüla, ta pai ashi.

"India indang tarutsüji science aser technology nung inyaktetba dak metaloka lir. Alima nung lennir ka akümtsübaji science aser technology ajanga lir" ta paisa shisem.

GU vice-chancellor Mridul Hazarika-i Guwahati University indang osang metedaktsüdang, university nung college 359 züngsema lir aser faculty tenet nung undergraduate aser post-graduate course tem agir, ta ashi.

Guwahati University nung 26 buba convocation nung Arts nungi kaketshir 431, Science nungi 138, Technology nungi 42, Engineering nungi 211, Medicine nungi 8, Law nungi 132, Management nungi 31, Commerce nungi 178, aser Faculty of Fine Arts nungi kaketshir ka degree tem agizük.

Mizoram sorkari tangalen nung ak bener aruba nokdang

Aizawl, April 29 (Agencies): Tashidak wara proktsü tsüsuba agi Mizoram state-i Myanmar, Bangladesh aser North-east state tem nungi ak bener aruba nokdangogo, ta Hokolbarnü ketdangser kati metedaktsü.

"Myanmar, Bangladesh aser North-east state tem nungi kiset shiruru aser ak bener aruba nokdangtsü atema mera agia inyang ta onoki District Magistrate tem dang tuyuogo,"

ta Animal Husbandry & Veterinary Department ketdangser kati metedaktsü.

Ai ashiba agi, state tesem kar nung ak aser ak chanurtem dak Porcine Reproductive and Respiratory Syndrome (PRRS) aser wara putetba osang nung ajemdaker iba telemetba agi.


2013 küm nunga Porcine Reproductive and Respiratory Syndrome (PRRS) wara agi Mizoram kongshia liasü, aser iba

mapang nung ak aser akchanu 3,000 dak tema asü, iba den külemi yaküma kasa wara ajanga ak 4,000 dak tema asü.

sorkarisa tanga yimtsüngtem aser Mizoram nung tang wara agi kongshia aliba district tem nung ak mayoktsü atema tetuyuba agütsüogo.

Sorkarisa nüburtemdanga item tesemtem nungji ak shi densema kiset shirururtem mayoktsü mesüra machitsü tuyuogo.

Meghalaya nung longkak aitaka NEHU-i Degrees agütsü



Shillong, April 29 (Agencies): Kaketshirtemi longkak aitaka Hokolbarnü North Eastern Hill University (NEHU)-i 24buba convocation nung kaketshir 9,000 jungnüa nem degrees agütsüogo.

NEHU Students Union (NEHUSU) kübok kaketshirtemi ajungbena longkak aita onük 1 nung takhangba agütsü, ajisüaka longkak aitem jagi convocation sentong nungbo

timtem magütsü.

Iba sentong nung NITI Aayog züngsem, Vijay Kumar Saraswat-i tongti tesemdang liasü.

Iba sentong nung medenteter nisung 7,495 densema candidate 8,989-i degrees nguogo. Parnok rongnung PhD 127, MPhil 47 postgraduate 839 postgraduate aser BA degree angur 7,975 liasü.

Sentong nung jembidang Dr Saraswat-i, alima nung kanga karaa renlokba linük rongnung

India densema lir aser talisa science & technology nung kanga karaa renloker, ta metedaktsü.

"Item technology tem ajanga nüburtem nem tashi magütsüra asenoki temelenshi bener marutettsü," ta paisa ashi.

"Linük nütsüng shilem asemsü nung shilem anabo tang tashi below poverty line (BPL) kübok lir, anungji linük renloktsü atema parnok ajungkettsütsü atema rangloker inyaktsüla," ta Vijay Kumar-i tesasaba olen ka ashi.



AO KAKETSHIR TELONGJEM SHILLONG HELPLINE NOTICE

Shillong nung züngnertem asoshi 'Admission Helpline' ka lapoka lir, anungji admission agütsü atema institutions tasentem aser Shillong result metetnüa teyari nungdakertemi iba helpline ajanga metetpelatsü akok, ta Ao Kaketshir Telongjem Shillong (AKTS)-i sangdong ka ajanga metedaktsü.

AKTS helpline ya kaketshir dang len sayutsü atema dang lir aser onoki admission agütsütsü menanzüker, kechiba süra college shia nung parnok inyakym dak keta aliba ama admission agütsü, ta metedaktsü.

Tongteprateptsü atema office member tem mobile number kar item ya lir:

1. Moachang Walling - 8119052695
2. Imsumeren Lemtur - 9615728155
3. Imtitangit Longkumer - 8416053560
4. Imtitongpang Longkumer - 8132808781
5. Sungjemlemzung Pongen - 8794631179

Mesüra e-mail address : aktshillong@gmail.com aser

Facebook Page : 'Ao Kaketshir Telongjem Shillong-AKTS' item rong nunga tongteprateptettsü akok



OFFICE OF THE AO SENDEN LITERATURE BOARD (ASLB) H.Q. MOKOKCHUNG-798 601 NAGALAND (Reg.No. HOME/SRC-6703)

Ref. No.

Date:

ASLB ARANGTET TATIDANG (AT) KULIKAKET AGÜTSÜTSÜBAREN NUNG TEMETETSÜ KAR SANGDONGER.


May 5, 2017 anogo Ao Senden Literature Board-i ayonga aliba sentong nung Arangtet Tatidang BA Diploma 2014, 2015 aser 2016 kümren balala nung takok ngua alirtem aser 2016 küm Post Graduate Diploma nung shirnoksa takok ngua ali, ajak arua iba kulikaket agizüktsüla.

Tanabuba nung 2016 tashi nung shirnoksa Arangtet kümren balala (AT 101-104 (PU), AT 101 G-102 G, aser AT 601 & 701) nung tenüing züluoka ali kasa sentong nung ajak arua adentsüla. Iba den takok kulikaket agizüktsüpur aser tushitsüpur shirnoksa ASLB-i sangdongogo kari kinunger anir arunüra nisung ka mesüra ana anir arua iba sentong nung dendaktsütsü akok.

Sd/-

I. Temjen Tzudir
Secretary, ASLB

Katrina Kaif Guwahati nung arua lir



(Source- Facebook)

Guwahati, April 29 (Agencies): Bollywood actress Katrina Kaif-i 'India Today mind rocks Youth Summit' nung adentsü atema Honibarnü Guwahati tonga aruogo.

Iba sentong ya Taj-i Vivanta nung ayongzüka agütsü aser Assam Chief Minister, Sarbananda Sonowal-i 'Assam for the 21st century: Working for the future' onük jembitsü. Anogo ishika tejaklen, India Today teloki 'India Today mind rocks' sentong ayongzüka indang noksa ka nung Katrina Kaif sülen Sarbananda Sonowal indang noksa amshiba atema ashishitep ken o ka adok. Ajisüaka, tawa tu India Today-i noksaji melen aser parnoki Katrina jakdang Sarbananda indang noksa enoktsü. Iba sentong nung Himanta Biswa Sarma, Sourav Ganguly aser Angarag Mahanta nungertemi shilem agütsü.



TIR YIMYIM YIMOBILEM (EDITORIAL)

DIMAPUR SUNDAY, APRIL 30, 2017

Tenükmeyiba Tsüngrem

Anüng ali aser iba telong aser tema nung aliba kechisarina ajak yanglusang Tsüngrem ka dang lir aser ibaji asenoki külemba Yihovah Tsüngrem lir. Iba dakji alaka nisungi teka agi yangluba taribi mesüra hon tsüngrem kecha mekülemtsübaji Tsüngremi nisungtem nem agütsüba mezüngbuba ozüng lir. Ajisüaka, asenoki Teyanglusang külemtsü melen teyangluri yangluba osettem mesüra shiruru mesüra anü, ita aser petinutem dang külemer. Ibaji pei tebu dang oba ta ajatsü melena tebui yanglua yutsüba ki oset ka dang oba ta ajaba den kasa lir. Meimchir tamashiji aji asütsü aser lendongji yangji keta lir. Israel nungner lenir Mosa ya Tsüngrem akümtsübuba aser Tsüngrem meimba lenir dang masü saka par nübortem kanga meimba lenir ka liasü. Iba temeim jagi pai Israel nungertemi Tsüngremi ashi mangai mashileni aotsü kanga shisabolua bilem. Pa atema ano shisabolutsü kaji pabo tenangzükba lima, alima tajung, Kannan limai maitsü asoshi Tsüngremi shiadoker liasü. Tetezü pa mali ser Israel nungertem ano tenangzükba lima matong tashi jajatsü. Idangji, Israel nungertemi Sinai tenem nung Tsüngremi parnok den jembiba amadok nungbo ta Mosai kanga shisabolua bilem. Ibayongji, pai par nübortem dang Tsüngrem shibai parnok Egypt nung alar tia nung aliba nungi anitet Pa mamatsü aser Pa dak alema tanga tsüngrem shinga mekülemtsü asoshi nenshipet nenshia metetdaksü. Item tekümdangtsü o tem rongnung Tazüngkunem tapu 4 tekong 24 nung " Nenok Tsüngremji tesamatsüba mi aser tenükmba Tsüngrem lir," ta shia alibaji tetsübutsü, tekümdangtsü aser tepelatsü o tulutiba ka asütsü. Tir Yimyimi adokba Ao Orthography 'Tetsümeli' nung Tenükmeyiba tetezü Taginütsü, Tenükshitsü, jangratemtsü ta shia angutsü. Asenoki Mosai Israel nungertem dang parnok Tsüngremji tenükmeyiba Tsüngrem ta ashibaji angatetsü merangra, Tsüngremi asenok kanga nükshia aser aginüa repranger ta angatet nung junger. Asenok asoshi teimla, tejenokdak aser tepelatsü osangji aji lir. Ajisüaka, ano külen Tsüngremji tetsübutsü Tsüngrem, kechiyong mi agi yimti aut küma samatsüba ama Pai meimchirtemjia samatsütsü akok. Atangji, Tsüngrem temeimjia mi ama tashi tulu, anungji mi agi temenen lima mali küma meshimeshia samatsüba ama asen taküm nung temenen alibatema mali küma pai meimnür. Aji oda, mi agi samatsüba ama asenok samatsü asü (?) mesüra mi agi temenen rongdoktsüba ama asen taküm ajunga Tsüngremi agitsüsa asenok alitsü (?), ibaji asenoki shimtetsü. Aji oda, Tsüngremi asenok kanga meimer asünungji Pai asenok ya temenen nem memesüzükdaktsüner. Iba jagi asenoki Pa toktsür tangar den senzüdang Pai tenük kanga merema repranger. Iba tashiji pai asen taküm aser tanüla apayur aser mesamadaktsüner. Asenokl Tsüngremi ashi manga temenen nung jajaba ajanga takoksa aser tesama ajurutsübaji Pai meteta lir. Ibayongji asenoki tashi mangayongbo Pai atasar aser asenok temenen den jajabaji tenükmerema Pa dangi meyipa maru tashi repranga atar. Iba tashiji asenoki külemba Tsüngremi asenok meimer. Atangji, tanü ama alima rongsen aser japujari mapatem jateta adokba putu nung asenok Tsüngrem nungi pilatsüsa temenen tatidang agi meketbanga lir. Aji oda, yimten nung jenjang ka alangtetnü dang, ali rongsen tilaka ajangzükndü dang mesüra shi azü tera jangratemnü dang asenok Tsüngrem den tesendaktep raksadoktsüa akok. Iba ama mapang asenoki asen Tsüngremji tesamatsüba mi aser tenükmeyiba Tsüngrem lir ta bilemtetsüla. Kechi tia nung lidir liaka Tsüngremi asenok ya tesamatsüba jenjang aser alar tia nungi anitet ta mamatsüla. Tsüngremibo asenok dak teti temulung lemteta lir, kechiyong asenokji par chirtem lir. Mark 12:30 nung ashir, asenok temulung ajak agi, asenok tanüla ajak agi, asenok mulungsentsü ajak agi aser asenok tashi ajak agi asenoki asen Tsüngrem meimtsüla. Tetezü, asenoki asen Tsüngrem meimba temeimji asen aolen ajak nung aser aseni inyakba mapa ajak nung sayutetsüla. Iba amaji lidaktsünüa Tsüngremi teti asen taküm ya tenükmeyia reprangdagi ta bilema kümdanga jajadi aser tasü itta bilemdi.

OLEMSABANG YIMYIM SANGRO

- I. ZÜLU PONGEN,
MONGSENBAI WARD, MKG

Hoi! Naga senso tajungtem angatetang,
aser kümkümshiang, ne tamang,
Asen kishizüng tongogo, asen tsükchir,
Sakang, kümkümshiang, nok atsütetang,
raratsü renemang, tamang jung ametang.
Sarasademang, Tsüngrem dang asüngdangang,
asen tsükchirji kong lir ta, "Mit kardang"
Tasü tait ochi nangri kangang, teko nung merang subotsü semokang,
temerük tsüngsem semokang, mera maibelentsüsa,
Na kümzüktsü asoshi tekümtet merang korang semang.
Ne tsükchiri shiba? koma arutsü?
Nai meimlai züba-züba alidang kinük kelen nungi
shirong ama, shisa tanep bener sangrasangjia, rongsenketsüng bener
ner kibong ajungketsüdi ta, tzüdi yongpang nungi
temoatsü tulu angutsü maongka arutsü, ma ta shidima.
Ano taoksatsüka, tsüngsang majungdang
anüng mepet tanak temeimi anü nembang ama,
Arem shiti telok tulu ka arua kiojen raksatsü ama,
sorkar tashi tulu Tsüngrem anemba sentong bener,
tamang jenjang anakshitsü arur.
Election arudagi, nai shiba aser koba shimtsü?
Party tasen aika, tsüdi yongbang nungi sorkar tashi bener,
ozü party yariang, na temoatsü tulu angutsü ta,
asen lima nungbo kecha tenokdangba malitsü, nashia chiang,
sarasademang, sentepia meranga oang, "saka mapang ka arutsü"
Kodang North East ya BJP agi meyokdir, idangjibo nashi mohol shibangtsü,
sentepi aotsü melen sorkar mapa inyakerbo Deobar nü office-i aotsüsa
akümtsü,
2016 nungibo 25 December ya Good Governance anogo kümdaktsüogo.
Ano 2017 April ita nungibo Office sodi sür sungyanglu birthday monga
tenzükogo,
Naga MLA temi (BJP) ya menokdangtetsü.
"YA AROKA SHISADANGDI"

BENJONG LIMA (LAND OF FESTIVALS)

-P. Renthly Jamir

Aor temeteter aikati moatsü, Tsüngremmong ratet indang aser maneni metsüngareta amungtsü züluba ngua parnok den repsem iba oset ya zülur. Tezülur karibo benjung bentsü aser mongtemmongtsü mebendangi zülur. Ano kari pai mangu majangshi sür tangari jembiba pai angu, metet ama zülur aji lendong lir. Aser Aor sobalibaa aruba benjungbentsü mongtem mongtsü tanü ama mapang ka nungsa lia amung ama mebilemstüla. Chi maka shi tua süzüng tepa arem süngo ajak repa chia aliba putu. Ano arür tsükchir tsübu agi among atena yangzüka ao majungba tensa yashi tashi lia aru. Yimtak takar süchir ka ana aliyongbo sensak lenimaor jangku agi tezü tener chikong mangu nübu zünger mezüngma liasü. Anungji item taku tia nung rangloker züluba mangur. koba ajanga lanurtemi ayatsüra memeteti mapa inyaktsü mangazüker. Aser anogoshia chiang jemang pela liang" ta asüba nung ameter rongsen meyakmekentsü süokia mebilemer. Tangar tokumokur kormanga akamatu inyakdang mapa inyaktsü keyi metsübui tsübuseta yishiyili süa liok nung mapang ajak lalur.. Aser langka asü majung party, party chiyungteptsü sentong tapu meyina purateter.

Naga lima NPF telok tashi arua Rioba Chief minister kümer benjungbentsü ya tali sabua mungteptsü tenzük. Naga kin ajak pei kin benjungtem to tali asentenshi. Aji dang masü governmenti road show purateta Linük rongsen jenti lalü. Aser tangbo iba Road show to lenmang pi dang mesayunür. Ano Hornbill Festival nung kümshi sen jenti endoker aser mozüki nung sensaker nembo yimra mozü ka magütsüteter. Tenem ozü ya ozü rongnung tashibangtsü atetapongtsü ozü ka lir. Aor otsü nung Tenem ozü tetshia aliba ajakji tamajung agi tembangba tesa lir. Tenem ozü apuba, kasetbaji anken tamajung asür. Ano akidang MLA tem Chief minister shimdang kodanga kaziranga min mesüra Sovima Camp Niathu Resort nung sen taitanütsü tashionshia shima maru. Aser India nung ajak dang sensaktiba State Nagalima 'Land of Festivals' ta nungja aja. India nung takar statetem Haryana, Maharashtra, Tamil Nadu Statetemia iba Nungja majar. Ano revenue teimtiba aruba aser anogoshia alima kinük pezüsülen nungi tamarenertem arua atenshidak Delhi nunga Land of Festivals ta maja.

(Maneni taruba adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

India nung ghonda 40 shia Khristantem amaker

New Delhi, April 29 (Agencies): India nung Hindu nationalist party sorkari 'Hindu linük' ka kumtetsü atema meranger aser ibaji ajanga Khristantem dak tashiyim mapa inyakba kanga bulur, ta tawa bushitetba osang ka ajanga metetdaksü.

All India Christian Council-i bushisüngdang asüba nung ghonda 40 shia Khristan dak amakba bushitet.

2016 kum Khristantem dak tashiyim mapa inyakba shilem 20 shi kati teimba akum aser iba mapang Khristantem dak teka sangshibaji noklang nung shilem 40 shi teimba atalokba bushitet. Ghonda 40 shia Khristantem dak ozüing alema mapa inyakba ataloker, ta AICC-i metetdaksü.

"Khristantem dak kanga bulua mapa inyaker. Taoba mapangtem nungbo state kar nung dang Khristantem anema mapa inyakba ataloka liasü, saka tangbo state 23 tashi nung timtem ajurur. Khristantemi lendong teimba ajurubaji Uttar Pradesh aser Telangana state tem nung lir" ta AICC-isa bushitetba metetdaksüo.

Khristantem dak ozüing alema mapa inyakbatem rongnung, züka merenshiba, kiojen raksatsüba, tenlaki rongdoktsüba, Laishibatem rongdoktsüba, Khristantem

dang pei tamangba yimsü toktsür Hindu yimsü agizükdaksüba aser sentep aser sarasadem sentongtem magidaksüi meinprongbatem lir.

Tatalokba ka nung, Hindu nungertemi yinzü agi evangelist ka züka merenshi, mangsa kumdaksü aser pa indang natzü jemdaksü. Ano, tatalokba tanga ka nung Khristan cemetery ka sensamasatsü aser terettem tuteter leper nung prokshia yutsü, ta All India Christian Council-isa ashi.

2014 kum Hindu nung Bharatiya Janata Party (BJP)-i election nung takok anguba sülen nungi Khristantem dak ozüing alema mapa inyakba kanga bulua inyaksü tenzük.

BJP-i Hindutva tangatetba prokshir aser iba nung parnoki India ji Hindu nung linük ta amanger aser Hindu nung sobaliba sülen anidakba linük ka asütsü ta alizüing lir.

BJP ya Hindu nationalist telok tongtiba- Rashtriya Swayamsevak Sangh (RSS) indang yimtenren kongsang ka ama züngshir.

Taoba ita tu, U.S Congress nung züngsem 100 dak temai India home minister Rajnath Singh dangi shidi ka zülü aser iba nung U.S. nung amenoka aliba Christian child

sponsorship telok- Compassion International nem maneni India nung mapa inyakdakjang ta mepishia metetdaksü.

Tan ita tetenzüklen, Hindu Yuva Vahini-i police tsüngdang ken o ka benokba sülen Uttar Pradesh kübok Dathauli tesem nung Khristan sarasadem sentong ka anendaksü.

Taküm kum tetenzüklen Hindu Yuva Vahini-isa Uttar Pradesh kübok Gorakhpur nung aliba Full Gospel Church amak.

Iba telok ya BJP lennir, Yogi Adityanath-i tenzükba lir aser tang pa ya Uttar Pradesh state nung chief minister kumogo.

Taküm February ita Hindu nungertemi amokmerena merenshiba sülen arishi kum 47 tain Dr. Kusuma Anjeneya Swamy süchia ao. Dr. Kusuma-i Hyderabad yimti nung Tasen Lai alemba atema parnok pa pur merenshi.

Iba mapang Hindu nung telok jagi evangelist Dr. Kusuma dang pa mi nung arongsü ta amokmeren aser 'Yisu-i na mi nungi kumzüksü asü masü?' ta asüngdanga pa merenshi. Iba tatalokba nung pa dak teka sangshiba osangbo mali, saka pa tekoloki azü atu aser ghonda ishika dang lirbo pa süchia ao.

ANO GO ABEN TSÜNGREM DEN

JABAZ SARASADEM

"Aser Jabaz-i Israel Tsüngrem dang ja-a ashi, oh Nai ni moajang aser kü..... aser Nü ket kü den liangma, aser ni mejashitsüsa Nai ni timtem nungi sotangma. Aser pai kechi asüngdang Tsüngremi mela."

- I Puti. 3:10.

Lai nungji pa indang aika shia mali saka t.9 nungji tera shisema lir. Aser ibaji pa kibong nung alirtem adianutem ajak dang pa tim tatemba ta shia angur.

Paji sensaker aser telemta asü, litsü lim maka asü, yimjung maka asü, kibong nung timtem ali asü pai iba timtem ta-bo shia mangur. Oda koba timtem tashidak südir süang pai pa nungdak meshia ajang-ajanga Tsüngrem dang sarasademba yangi angur. Jabaz-i kechi Tsüngrem dang meshi Tsüngremi pai aginüba ajak mela/agütsü.

Anogo ka tenzükdang asenokia kechi meshir, koda, kechi atema meshia sarasademer? Aiben Tsüngremi jembiba aseni mangashir aser aseni jembiba Pai mangashir. O tajung talangka sarasademba ta masü, na koda tesendaktep ali itemji tongtipangtiba lir. Ashiko Jabaz ya tobur majung ana meshi-metsür ka-anga asütsü akok. Saka pa sarasadem Tsüngremi langzü.

Tsüngremi tema ajungba masü temolung teindang aginür, Na timtem ka ali asü? Jabaz ama asen temulung ajak agi asen nungdak Pa dang shidi, Pai langzüksü. Kodanga memelenshiba, marakzüba ochi putu lung Pa dangi Jabaz ama meyipdi, Pai langzüksü.

SARASADEM:

O Kibuba, menen mulung bener Nü dangi arur; Nai agizükangma. Amen

Trump'er Cabinet züngsemtemi hopta shia sarasadem sentong agir

Washington, April 29 (Agencies): US President Donald Trump'er cabinet nung tongti züngsem aika hopta shia ajurutepe sarasademer.

America nung tongti sorkar ketdangsertemi Tsüngrem dang nungi linük asoshi teyari meshir, ta Charisma News ajanga metetdaksü.

Hopta shia sarasadem sentong ayongertem rongnung Vice President Mike Pence dena lir aser ano pa dak alia sentong ayonger cabinet züngsem 8-i lir.

Parnokji, Education Secretary Betsy DeVos, Housing & Urban Development Secretary Ben Carson, Secretary of Agriculture Sonny Perdue, Secretary of Energy Rick Perry, Health & Human Services Secretary Tom Price, Attorney General Jeff Sessions, Environment Protection Agency Administrator Scott Pruitt, aser CIA Director Mike Pompeo nungertem lir.

Sarasadem sentong ayongtsü atema sentong atongertem rongnung Capitol Ministries Founder, Ralph Drollinger dena lir. Capitol Ministries-isa House aser Senate nung Bible Study ayonga agir.

"Linük junga alitsü aser len anitsü atema lennirtemi Tsüngrem dang nungi teyari meshir. Tsüngremi asenoki meshiba mesüra bilemba dang nungi talila moatsütsü" ta Drollinger-i Efesa 3:20 nung ajemdaker ashi.

President Trump-a sarasadem sentong aser Bible study nung arua adentsü atema onoki pelashishia jaoker, ta sentong ayongertemi ashi.

Tang US nung Trump'er sorkar nung züngsem aikati parnok tamangba yimsü indang yimjak nung jembir aser President Trump-i nüboyimba mapang nunga nisung aikati pa atema sarasademja liasü.

Pope Francis-i anogo ananü atema Egypt semdang

Cairo, April 29 (Agencies): Lendong ajurutsü akok ta arentaka bilemaka Pope Francis-i Christian-Muslim tesentaktep longjema lir ta sayutsü atema anogo ananü Egypt linük semdang.

Hopta asem shi tejaklen Islamic kiralongrartemi Egypt nung Palm Sunday nü tenlaki ana tashi amak.

Anogo ananü mungzükdang, Pope Francis-i Cairo nung

Egypt nung tamangba aser yimten lennirtem den ajuruteptsü.

Paisa Coptic Orthodox Church nung Tawadros II den ajuruteptsü aser lendong nung takoksa angurtem asoshi sarasademtsütsü.

Pope-i Egypt semdangba nung tongtipang kaji Sunni Islam nung kum 1,000 tema tangazükdak menden- Al-Azhar semdangba asütsü.

Idakji pai grand imam Sheikh Ahmed el-Tayeb den ajuruteptsü aser international peace conference ka nung adentsü.

Francis-i Egypt President Abdel-Fattah el-Sissi den ajurutepe aser Coptic Orthodox Church tongti tesem semdang.

Tanü Pope Francis-i Islamic State kiralongrartemi nisung 30 tepsetba St. Peter's church semdang aser idakji sarasadem sentong ka nung aden.

Mkg Compound Baptist Arogo lanurtemi traffic ministry mapa inyak



Mokokchung Compound Baptist Arogo Youth Director Lanuzülü anir lanurtemi Mokokchung nung traffic police-tem nem chiyungtsü balala agüja jajaba mapang tangokba noksa nung angur. Mokokchung, April 29, 2017

Mokokchung, April 29 (TYO): Mokokchung Compound Baptist Arogo Youth Ministry-i Honibarnü chiyungtsü tapu balala bener traffic ministry mapa inyaka jajaogo.

Tanep parnoki O.C traffic

police office semdanga yangji ketdangsürtem den sensaksema sarasadem agütsüba den chiyungtsü balala ajanga lemsatep. Iba den ano Mokokchung town nung traffic noktakba tesem ajak semdanga

or traffic duty noktaker ajak den chiyungtsü ajanga lemsatepe liasü.

Iba mapa ya taküm agi kümnabuba inyaker aser iba ministry ya tongtibangsa traffic-tem ya sorkar nungi itasen

nguaka parnoki inyakba mapa ya temela masü, anungji, parnok nem tenüngsang agütsüba den ano tali ajungshitsü nükjidong yur tenzükba lir, ta Mokokchung Compound Baptist Arogo Youth Director Sp. Lanuzülü iba

osangbener den jembidang ashi. "Traffic mapa ya tsüngsang ajung – majung kecha mali anogo shia noktakba mapa ka lir, yangi anibülem kanga lir, parnoki oliorartem tipdema yutsür, drivertem dang gari kümdanga anitsü lenmang tuyur, ibai bendanga agüja inyakba mapa rongnung ka lir", ta paisa shisem.

"Youth Ministry kati iba amai semdangba ya konang nüngsang tulu angu amai onok pelateper aser iba ajanga onok pei mapa nunga tali tajungba, tekümdangba aser meranga inyaksü ajungshir", ta iba osangbeneri Traffic Police Waimeren den jembidang pai ashi. "Züba-züba alirtema iba yagi tali kumkumshidaksür, aji oda, tarutsü nunga iba mapa ya maneni inyaksü imlar", ta paisa shisem.

OLONG PAITEP # 4407

1	2		3			4		5		
										6
7										
						8				
					9					
10		11								12
13				14				15		
						16				
				17						

TIPILEN		LANGTSÜNGLEN	
1. Ammang tiyong	- (7)	2. Idakji	- (6)
7. Wamesa	- (5)	3. Tanur tetsür dang ajaba	- (4)
8. Maneni / Mezüngdangtet	- (5)	4. Teinyaktsü	- (4)
10. Ozüng alema azütokshirtem	- (11)	5. Hopta nung mezüng nü	- (6)
13. Mangdang / Tebilemba	- (5)	6. Aiwa-asangwa	- (5)
16. Bod _ _ _ _ _	- (5)	9. Jenjang aketba yin ka	- (3)
17. Süng rangsar ayuba	- (7)	10. Tali tabung	- (5)
		11. Atsütep	- (6)
		12. Songjen	- (6)
		14. T _ _ _ _ hir	- (4)
		15. Iba mapang	- (4)

OLONG PAITEP # 4406 TELANGZÜBA

TIPILEN :	LANGTSÜNGLEN :
2. Anükalem, 4. Mesak, 5. Epet, 9. Meimtep, 11. Posü, 12. Patak, 13. Tekettsü.	1. Kümbang, 2. Ayak, 3. Leptep, 6. Nati, 7. Yiar, 8. Sangküm, 9. Metsük, 10. Mazü.



Lilir IS, Dimapur

TANÜBO NAI LANGZÜANG

Q: India nung koba yimtii Pierre L'enfant Planning Excellence & Achievement Awards-2017 tama angu?

- [A] New Delhi [B] Bhubaneswar
[C] Guwahati [D] Chennai

(Taruba adok nung onoki langzüksü)

YASHIADOK TELANGZÜBA : Dileep K Nair

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zür, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAIA YA METETER MA INDIA INDANG TEMETETSÜ KAR:



City Montessori School

- * Alima nung school tulutibaji (kaketshir teimtiba) India, Lucknow yimti nung aliba City Montessori School lir aser iba school nung kaketshir 45,000 dak teimba lir.
- * Indian Railways nung inyaker nisung million 1.3 dak tema lir aser ibaji linük aika nütsüng dang nungi teimba lir.
- * 2014 küm Lok Sabha election nung nisung crore 54-i vote agüja liasü aser ibaji US, UK, Australia aser Japan nütsüng senteper-a madoksar.
- * Küm ka kija nung India nung tanur asoba nütsüngji Australia nütsüng dang nungia teimba lir.

SUDOKU # 3520

3	9		4	6				
	7				3	2		
		6	3	7	5			
		2	4	9				
7	6				4	5		
9		4		6	7		1	
1	5		3		2	6		
4								
	9			2	4	7		

TELANGZÜBA # 3519

7	8	9	4	6	1	3	5	2
1	6	4	5	2	3	9	8	7
2	5	3	9	7	8	6	1	4
4	1	6	3	5	7	8	2	9
9	7	8	2	1	6	5	4	3
3	2	5	8	9	4	1	7	6
6	9	7	1	8	2	4	3	5
8	3	2	6	4	5	7	9	1
5	4	1	7	3	9	2	6	8

OJANG LUTEP # 4012

- ONKIBG : □□□□□□
UNNG : □□□□
UAAPNI : □□□□□□
AN : □□
SSÜENT : □□□□□□
AJEMMRA : □□□□□□□
GATANR : □□□□□□
BONKIG : □□□□□□
ANKODGA : □□□□□□□
EMENMEPTSÜ : □□□□□□□□□□

OJANG LUTEP TELANGZÜBA # 4011

TSÜRABURTEMI KECHISARENA AJAK TAKZÜTAKBONGA ATAKARUA TENDANGA ASER ASÜNGTETA LIYONGA ARU

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai-ar nai-a na asoba anogo ita den tanü nü tia medemdangang (Horoscope) :



Aries
21/3-19/4

Tanü shisatsü bushiba nung mapang intoktsüla. Osang tila ka dang metetaka aji na atema nungdak adoktsü. Tanü aieni aotsü mapang tajung asütsü.



Taurus
20/4-20/5

Nü nungdakji nü len tuyur ama asütsü. Tensa ajak nai aginüba ama asütsü. Nü dak tejangraba tasen kar arutsü akok.



Gemini
21/5-20/6

Sen atema inyakdang nü sempet dak temulung malemtsüla. Sen kanga kümdanga amshitsü nungdak. Sen aiyi amshidangbo teyarir kar dena inyaktsüla.



Cancer
21/6-7

Nai ajak den liromedema litettsü. Nai shisatsü tasen bushiba nung temulung agütsütsü. Nai na ang shitak ta bilemtsü.



Leo
23/7-22/8

Nü lokti melentsü merangang. Ozüngi ashi angar telok den aden tajungba asütsü. Mapa kecha nunga marendaktsüla.



Virgo
23/8-22/9

Külem inyaker takok anguba mokok machitsüla. Tangar dak tenük meremtsü melena parnok yaritsü nungdak. Nü wadang nung lenmang tajung aika ngutettsü akok.



Libra
23/9-22/10

Nü miim o shinga danga mashitsü kümdangang. Nai meimer indang otsü aika angashitsü akok. Tiyazü aser ochi na bendangtsü merangang.



Scorpio
23/10-21/11

Tanü nü temang kanga tashi ita alitsü. Nai tajangzük aliba mapa kar meteta arutsü akok. Nü dak aliba sempet ajak amshia inyaktsüla.



Sagittarius
22/11-21/12

Bendanglen tongtepratepa bushiba kaketshisatsü nung takok angutsü. Internet aser phone ajanga tongtepratep mapa junga inyaktettsü. Nü tai nangzüktsü anogo tajung.



Capricorn
22/12-19/1

Tembar den tesendaktep melenshitsü. Tembar tajung kari na nungdakba mapang meyaritsü saka külakoktsütsü akok. Nai meimer den ochi alitsüla.



Aquarius
20/1-18/2

Mapa nung kanga mazüngtsü. Tensa agi na business atema aieni aotsüsa akümtsü akok. Mapa dak sendakba senden mamentsü merangang.



Pisces
19/2-20/3

Nü dang tuluba den tebang agi asateptsü akok. Olemtep mapang telok anapronglai pei mulungba ang aginütsü. Tanü mapa tasen metenzüktsü merangang.

TEMANG ANEMALIBAREN

Tepo mesüngdaksütsü inyakyim 5

2015 küm America nunger kisüngi tepo mesüngdaksüba dak sendakba nung sen dollar billion 11 dak tali intok. Iba den külemi sen billion dollar 1.4 kidang tepo mesüngdaksütsü atema lijaliyong asüdang intok.

Tepo mesünga kümdaktsütsü asoshi oset tapu aika lir. Ajisüaka oset aika nung chemical dena aliba agi nüburtemi kanga ashishir.



Anungji tepo nung takoksa malui mesünga kümdaktsünüra, teküpoklen agüja aliba yimya pungu ya benshi nung tajangzük angutsü.

- Totzü agi tebang mejutokba (Oil Pulling)** : Tebang nung totzü puja adoka mejuba ajanga tebang nung aliba mesen koba ajanga tepo rüdaktsür aser tepo wakong sentsü kümdaktsür itemji samadaktsür. Nisung aikati sunflower mesüra sesame totzü amshir saka totzü mashi ka amshitettsü.
- Baking Soda agi tepo meyuang** : Baking soda nung mesünga kümdaktsüba mozü densema lir, anungji iba ya amshia tepo meyuba ajanga tepo mesünga ngudaktsür. Baking soda ya toothpaste yangluba nunga amshir.
- Hydrogen Peroxide amshiba**: Hydrogen peroxide dak pa sasa 'bleaching agent' keta lir aser iba jagi tebang nung aliba mesentem tepsettsür.
- Apple Cider Vinegar amshiang**: Apple cider vinegar ya küm noklang aika mesen tepsettsü aser shitokshira atema amshia arur. Anungji iba ya amshiba ajanga tepo mesünga kümdaktsür.
- Süngjanglijang aser süngolemba achiba** : Süngjanglijang aser süngolemba peria achiba ajanga temang rangben aser tepo asoshi teyari agütsür. Süngjang mesüra süngolemba tamo achiba ajanga tepo nung maloka aliba mesen samadaktsüba nung yarir.

(Source - Internet)

Q. Taruba election nungbo constituency shia nung political party aser Independent party shia Fund Raising Committee shima candidate yari nunga koma süla? ?

Nagaland nungbo Audit-a magiteti Fund Raising Committee purtem takarjang akümtsü aser tatem nung Clean Election ji Ambhraa ang ka kümadoktsü.

-SMS

Election Fund Raising Committee nemji, Candidate aser par adianutemi sen teimba voters temdang nungi tama tenla agütsüa dokra koda asütsü?

-SMS

Asen Aortema kechia tasa asür ya Clean Election-a junger ta ano sen sarua Candidate yaridi ta kangabo tebulutep. Tatem nungbo yimtsüng among süngkümshii kechi atongtetdir ajisa süküm'ar .

-Mar.Naharbari

Clean Election Campaign mapa teinyakdak nung tang ano Party shia Fund Raising Committee shima yura ajia parnok atema dang asütsü.

-SMS

Clean Election mapa tenzüker aorji sen menüngdaktsü, saka putu menden ajaki Clean Election tenüng nung candidate tem dang sen mamshitsü ozüng agütsütsüla. Shibai mangalir yimtsüngi maitdaktsütsüla. Aji clean election tamendakdak asütsü.

-SMS

Kanga jungle, saka committee shimtsü nübo mangutsü südi, kechiaser Naga nungerji peiji (self) shibaar mangatet oda pa kechi aser pai kechi inyaktsü nükjidong aser mangdangtem kecha maka. Oda tular kümra ojang ta bilemba nüburtem lir, anungji fund bushitsür lira ajaki contest sünütsü aserbo committee ji shimtsüba nübu mangutsü amai bilemer dangashi.

-Tali Pongener.

Kangasa ajungtsü... Ao Lima nungi iba inyakyim tenzük nung koma süla. Yangi aika sendaka lir.

-tiriyim webmail

Ashioaktsür aser auer aika adokla.

-tiriyim webmail

TAN HOPTA ATEMA - KOMA SÜLA ?

Q. Govt office ajak nung anogo shia biometric system amshia tenüng aja nunga koma süla ?

Olong 20 shi nung May 05, 2017 tashi nung iba telangzüba ya onok dangi e-mail - tiriyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

Baahubali 2-i mezüng anogo nung sen crore 100 dak tali aatet



Chennai, April 29 (Agencies) : S S Rajamouli-i direct asüba "Baahubali 2: The Conclusion" film India nung sayar mezüng anogo nung sen crore 100 aazükogo. India nung film ka agi mezüng anogo nung sen timtiba aatetbaji iba film ya lir, ta senotsü ketdangsertemi ashi.

Film yanglur Karan Johar-ia dena iba film agi mezüng nung takok tulu anguba asoshi kanga pelaba metetdaksü.

Trade analyst Taran Adarshi, iba film Hindi oshi agi meyipzükba agia sen crore 36.54 aatetogo, ta Honibarnü Taran-i tweet asü.

"Baahubali 2: The Conclusion" ya Telugu film lir

asere iba film ya Tamil, Hindi aser Malayalam oshi tem nunga meyipzükba lir.

Hindi agi meyipzükba ji Karan Johar ajanga inyak aser pai, film takok aguba asoshi kanga pelar, ta ashi.

"Mezüng anogo nung bilema maliba aser pungmang nunga manguba takok nguogo...ibai otsüsüsü tajangzük....!!!" ta pai tweet asü.

Telugu oshi indang agi sen crore 53 aateta liasü, ta Trinathi ashi.

"Iba film kanga junga lapoktetogo. State ana (Andhra aser Telangana) kija nung film mezüng asayanü sen timtiba aatetbaji iba film ya lir. Hopta tsüngda nung iba state ana

nungi sen crore 100 dak tali aatetsü imlar," ta pai ashi.

Tamil Nadu kija nunga mezüng anogo nung iba film yangi sen crore 12 tashi aatet.

"Hokolbarnü anepdang iba film sayutsü mathi asü nungbo iba dang nungi sen timba aateter lila. Hopta tsüngda nungbo ano talila aatetsü imlar," ta Trinathi ashi.

Hokolbarnüsa Kerala nunga kasa film agi sen srore 7 shi aatet.

US nunga Brihostibarnü kija nung sen dollar million 2.5 aatet.

Iba film nung Prabhas, Rana Daggubati, Anushka Shetty, Tamannaah Bhatia, Sathyaraj aser Ramya Krishnan nungeri tongti shilem agia lir.

Samsung tanaben Q1 smartphone temaba jenjangi tuogo

Seoul, April 29 (Agencies) : South Korea nung electronics tetsüti, Samsung Electronics ano tanaben alima rangben smartphone market nung temaba jenjangi tuogo. Parnoki iba jenjang ya ano Galaxy S8 masayadang ngutet, ta Honobarnü osang ajanga metetdaksü.

Shishilemba asadanga telok, IDC-i South Korea tech tetsüti, Samsung-i taküm January nungi March ita tashi nung smartphone million 7.9 yokogo aser ibaji ajanga parnoki shishilemba shilem (Market share) nokang nung 22.8 % atong. Parnok den tokteper US indang Apple company

tanabuba jenjang nung lir. Apple-i shishilemba shilem, noklang nung shilem 14.9 ngutet.

Yaküm October nungi December ita tashi nung Apple mezüng jenjang nung tua liasü saka tan melentepogo.

Galaxy Note 7 phablet ajanga takoksa bener arutsüaka Samsung-i küm nung tatembang quarter nung noklang nung shilem 18.5 tashi parnok shilem ajungketteta iba jenjang atong.

Parnok indang smartypone tem charge asüdang mi adoker ta osang angashiba sülen parnok iba oset yangluba anen.


Samsung aser Apple na sülen Huawei Technologies,

Oppo aser Vivo compay tema temaba pungu rongnung anidakdar. Parnok senteper shishilemba shilem 22.4% ngua lir. Iba shilem rongnung Huawei 9.8% ngua asembuba jenjang nung lir.

Parnok sülen Oppo-i 7.4% aser Vivo-i 5.4% nguteta pezübuba aser pungububa jenjangtem nung lir, ta osang ajanga ashi.

Samsung-i yangluba Galaxy S8 aser S8+ smartphone tasentem India nung sayar hopta ka tsüngba nung 80,000 tashi jilia manga lir aser ita tatem tashi nungbo phone 150,000 tashi jilia mangatsü imlar.

India-i GSAT-9 communication satellite May 5 nü amentsü



Chennai, April 28 (Agencies) : India-i rocket tesashi, Geosynchronous Satellite Launch Vehicle

(GSLV-F09) amshia communication satellite, GSAT-9, May 5, 2017 nü anünglak nung amentsü, ta Hokolbarnü

ISRO-i ashi.

Indian Space Research Organisation (ISRO)-i ashiba agi, GSAT-9 communication satellite ya Ku-band inyakyim ajanga South Asia linüktem den tongtepratepsetsü nükjidong nung amener.

"GSAT-9 ya ISRO indang standard I-2K bus nung renema yua lir. Standard I-2K bus ajanga seret 2,230 ajungkettsetsü. Iba satellite ya küm 12 dak tema meraksai alitsü," ta ISRO sangdong ka ajanga ashi.

Satish Dhawan Space Centre, Sriharikota, Andhra Pradesh nungi GSLV rocket ajanga iba satellite khakettsüsü, ta parnokisa ashi.

'Doctor Dolittle' sayatsü anogo melenshi

Los Angeles, April 29 (Agencies) : Robert Downey Jr-i tongti shilem agiba film, "Doctor Dolittle" sayatsü atema mapang atsüzükogo, aser iba film ya April 12, 2019 nü sayatsü.

"The Voyage of Doctor Dolittle" ya May 24, 2019 nü sayatsü liasü, ajisüaka iba ya Star Wars den mapang külemi tenjitepba ajanga anogo atsüzük, ta Ace Showbiz osang ajanga metetdaksü.

Disney & Lucasfilm-i "Star Wars: Episode IX" May 24, 2019 nü sayatsü atema sangdongba

sülen Universal-i "Doctor Dolittle" sayatsü anogo melenshi. "Star Wars" film ya Colin Trevorrow-i direct asü aser iba film ya US nung Memorial Day Weekend, May 24, 2019 nung sayatsü.

"Doctor Dolittle" ya 1920 küm Hugh Lofting indang Childrens' Books nung ajemdaker yanglu.

Universal Pictures-i "Doctor Dolittle" project atema director-writer Stephen Gaghan den senteper inyaksü aser producer temji- Susan Downey den Joe Roth aser Jeff Kirschbaum nung asütsü.

Ghonda 24 tsüngda Katrina followers mn. 1 ajung



Mumbai, April 29 (Agencies) : Bollywood actress, Katrina Kaif-i Brihostibarnü tang mezüng Instagram lapokba sülen ghonda 24 tsüngda nung followers million ka jungogo.

Jagga Jasoos actress, Katrina-i taoba küm la asoba anogomung nung Facebook account lapoka liasü, aser yashi lai Instagram account lapoka la indang noksa asem lemsatapa liasü.

Instagram nung lai mezüngbuba zülubaji, "ozü kidang nungi tasen tenzüker ... #helloinstagram" ta lemsatap.

Ano külen tanga osang ka ajanga ashiba agi, actress, Deepika Padukone indang 'Raabta' ken sayaba anogo nung Katrina Kaif-i Instagram account tenzüka ajanga

Deepika-i la dang mepelar.

Deepika'er medemer kati, "Raabta ken sayaba anogo nung Katrina-i la Instagram tenzüka ajanga Deepika'er teloki tera mepelar. Ajungbenabo parnoki ken sayatsü anogoji memelenshitet. Ajisüaka iba tatalokba ajanga Deepika densema Raabta telok tejangraba makai kümdaksü," ta ashi.

Deepika aser Katrina na tsüngda tensendaktep kanga jungabo mali aser taoba mapang nunga tena tsüngda mepetmesü aiben adokogo.

Sanjay Leela Bhansali indang film 'Padmavati' tangokba nung tang Deepika-i shilem tagidak lir aser la Cannes Festival 2017 nunga adentsü. Ano külen tang Katrina-i 'Tiger Zinda Hai' film nung Salman Khan den shilem tagidak lir.

Bieber agizüktsü asoshi Jacqueline renemshir

Mumbai, April 29 (Agencies) : Actress Jacqueline Fernandez-i, ni Hollywood fashion stylist Paris Libby den taruba hopta London nung ajurutepa Grammy Award angusang Justin Bieber India-i aruba mapang agizüktsü asoshi renemtsü, ta ashi.

Libby-i Liam Hemsworth, Jeremy Renner, Vin Diesel, Robin Thicke, Sharon Stone, Miley Cyrus, Zoe Saldana aser Britney Spears nungerasa

renemtsüogo.

"Ni tang ya kanga mazüngi aliba mapang ka lir anungji ni tan hopta London nung Libby den ajurutepa Bieber agizüktdang kechi sobutsü ibaji atema jembia ayutsü," ta Jacqueline-i sangdong ka ajanga metetdaksü.

Bieber-i May 10 nü India nung arua D.Y. Patil Stadium, Mumbai nung pa indang Purpose World Tour' kübok shilem agitsü.

Biber ya White Fox India nung director, Arjun Jain-i anir arurba lir.



Hyderabad, April 29, 2017: Honibarnü Hyderabad nung Swarna Bharat Trust sentong nung Urban Development, Housing & Urban Poverty Alleviation and Information & Broadcasting Union Minister, M. Venkaiah Naidu-i training agirtem ajurua jembiba noksa nung angur. Kasa noksa nung NITI Aayog Vice Chairman, Arvind Panagariya den tanga ketdangsertema angur.

EVMs onük nung EC-i party ajak senden ayongtsü: Nasim

Chandigarh, April 29 (Agencies):

Election Commission of India (ECI)-i yimtenren party ajak senden ka ayongtsü aser iba senden nung parnok dang electronic voting machines (EVMs) ji raksaa amshitsü makok aser timtem mali ta ashitsü, ta tanü Chief Election Commissioner, Nasim Zaidi-i metetdaksü.

Paisa, nüburtam tamang koktettsü atema joka taruba nungibo Election Commission-i election ajak nung Voter-Verified Paper Audit Trail (VVPAT) amshitsü tebilemba lir, ta metetdaksü.

Chandigarh nung osangbenertem den jembidang Nazim-i, "Kobi melii onoki party ajak senden ka ayongtsü aser parnok dang EVMs ji raksaa amshitsü makok aser tamang

katettsüa lir ta ashitsü," ta metetdaksü.

Yimtenren party balalai EVMs ashishia, election nung ballot papers dang amshitsü atema akhangba dak sentakba nung pai item o jembio.

Tawa opposition party 16-i Election Commission of India ajurua pa dang, nüburtam joko EVMs dak tamang makar, anungji ballot paper system amshitsü, ta takhangba agüja liasü.

CEC-isa, taruba election tem nungbo VVPAT machines amshitsü atema itemji alizüksü asoshi inyakdar, ta metetdaksü.

"VVPAT alitsü atema onoki senotsü ajak nguogo. VVPAT lakh 15 den PSUs ana Bharat Electronics Limited (BEL) aser Electronic Corporation of India (ECI) alitsü atema onoki mangaogo," ta paisa ashi.

2018 küm September ita tashi nungbo VVPAT machines lakh 15 renemer alitsü, ta pai ashi.

Polling station ajak nung VVPAT amshiba mezüngbuba linükji India asütsü, aser ibaji ajanga voter agütsürtemi tali mulunglemtettsü, ta paisa shisem.

EVM nung nisung kati vote agütsüba sülen VVPAT nungjagi 'receipt' ka alutsü, aser ibaji ajanga pai melungba candidate nem vote shitak agütsüba jangjatsü.

Taküm Uttar Pradesh, Uttarakhand, Goa, Punjab aser Manipur state tem nung assembly election agiba sülen AAP tongti aser Delhi Chief Minister, Arvind Kejriwal, BSP lenir, Mayawati aser Samajwadi Party tongti, Akhilesh Yadav nung densema yimtenren party aikati EVM anema ola adokogo.

AAP MLA 34-i Kejriwal masü Vishwas ang Delhi CM aginer

New Delhi, April 29 (Agencies): Honibarnü Delhi BJP otongdar, Tajinder Pal S Bagga-i, Aam Aadmi Party MLA 34-i Arvind Kejriwal masü saka Kumar Vishwas ang Chief Minister shimdaksüner, ta ashi.

Tamalena paisa, AAP MLA 34-i MCD election nung party-i tamakok ngura Delhi Chief Minister, Arvind Kejriwal pa menden nung anendaksüner, ta jembia liasü.

Delhi Municipal election

nung AAP-i tamakok anguba sülen anogo asemnü lir BJP leniri twitter ajanga, AAP MLA 34-i Dr Kumar Vishwas Chief Minister südaksüner ta osang angazükogo, ta metetdakja liasü.

Hokolbarnü AAP lenir, Kumar Vishwas-i, election nung tamakok anguba atema EVMs nem dang tai tongloksüba tai, April 23 nü Delhi municipal election nung tamakok anguba atema party-i tesülen meyipa repringshitsü nüngdaker, ta jembia liasü.

"Ni kanga mepelar, kechiyong onoki trokbenbuba atonga tamakok nguogo. MCD election nung nüburtam onok nem vote magütsüba jangjatsü," ta pai ashi.

"EVMs nem tai tongloksüba jangjatsü. Ibaji-a kuli ka asütsü akok, aser iba atemaji benoka jembitsü, ajisüaka onoki vote agütsürtem anir marutet. Tamakok anguba atema party-i meyipa repringshitsü," ta paisa ashi.



Patna, April 29, 2017: Honibarnü Patna nung aliba Bihar Regimental Center, Danapur nung tang tasen shimba Army temi 'passing out parade' nung shilem agiba noksa nung angur.

Party tem dangi tenla arubaji Aadhaar den sendakteptsüla: Manish Tewari

New Delhi, April 29 (Agencies): Congress lenir tain aser taoba mapang Union Minister, Manish Tewari-i, yimtenren party tem dangi tenla sen arubaji Aadhaar den sendakteptsüla, ta takhangba ka agütsü.

Honibarnü Tewari-i, party tem dangi tenla arubaji Aadhaar den sendakteptsüla ajanga yimtenren senotsü nung ochishi tali alitsü, ta ashi.

Corporates temi yimtenren nem tenla agütsüba nung shilem magütsüla, ta paisa ashi.

"Party mashii ka dangi tenla aruba nungji 'address' alitsüla. Nisung kati sen lakh 1 mesüra sen lakh 5 tenlaba sen ajakji Aadhaar den sendakteptsüla," ta pai ashi.

Association for Democratic Reforms (ADR)-i ayongzükba 13buba electoral & political

reforms senden nung jembidang Congress leniri, "Aadhaar den sendakteptsüla ajanga senji kong nungi aru, ibaji jangjatsü. Nisung kati sen 20,000 tenlaba nungi sen 2,000 tashi ajema alutsütsü menüngdak, kechiyong ibaji ajanga coupon 10 tali menüngtsüsa akumtsü," ta ashi.

Corporates-i yimtenren nem tenla agütsüba nung Supreme Court-i obendang agütsüba nung ajemdaker Tewari-i, "Au,

corporates ket nung Aadhaar cards mali. Corporates-i parnok indang shareholder tem atema tajangzük bushir. Yimtenren nem tenla agütsüba maparen nung parnoki shilem magütsüla," ta ashi.

Congress lenirisa, yimtenren party temji Right to Information Act (RTI) küboki aيتدaksü nung dang yimtenren tenla nung ochishiba alitsü, ta ashi.



April 29, 2017 nü New Delhi, Jantar Mantar nung matamabensartemi New Delhi Municipal Council (NDMC) anema takhangba balala agüja longkak aيتدang parnoki tsüngtsüker amenba wheel chair ka rongdokba noksa angur.

Tatembangbuba tongbangji Chhattisgarh nung raratsü: Raman

Raipur, April 29 (Agencies): Chhattisgarh Chief Minister, Raman Singh-i, Maoists anema tatembangbuba tongbangji Chhattisgarh nung raratsü, ta ashi.

Paisa, Bastar tesem nung terenlok mapa inyaksü atema tesünep mali tashi sorkari süngjema malitsü, ta ashi.

Tawa Sukma district nung Maoists telungpurtemi CRPF sepai 25 tepsetba dak sentakba nung Chhattisgarh legislative assembly nung o lemteptsü atema Congress-i benoka liasü, aser iba senden nung Singh-i, "Linük nung Maoists anema tatembangbuba tongbangji Chhattisgarh nung raratsü. Bastar tesem nung telungpur maneni mita aotsü aser nüburtam atema Bastar nung tesünep bener marutsü tashi state sorkari animesüngzüksü," ta ashi.

"Maoists-i terenlok mapa tsübur. Parnoki gari lenmang, apo, anema-alibaren aser shisaliok nung terenlok tsübur, ajisüaka Bastar nung lenla ajak nung terenlok alitsü atema sorkari inyaksü," ta paisa ashi.

"Sukma kübok Burakpal nung tatalokba ya tejashitsüka lir, kechiyong asen tasütait sepai aika süogo," ta paisa ashi.

"Telungpur anema inyakba dak sentakba nung sorkar mapatongji tejangja. Kiralongraba aser telungpur mapa nung atsü-anem makatsü. Democracy kümzüksü atema onoki raratsü," ta pai ashi.

"Sukma-Doranpal-Jagargunda sendakteptsü kilometer 57 gari lenmangji central aser state security forces senteper inyaker. Bastar kübok item lenmang yangluba kümzükdang asen sepaitemi taküm tenla agütsüogo. Ni parnok nem akhüm agütsür," ta paisa shiesm.

Iba senden tenzükdang Congress legislative party lenir, TS Singhdeo-i, sorkaribo Bastar tesem nung Maoist tebilemstü ajema akumer ta jembir, ajisüaka mapang shia sepai jenti asür; Police intelligence tashimait kümogo aser anogo 46 tsüngda Maoists-i anaben tashi sepaitem amakba ajanga police tashimaitba sayur, ta aija liasü.

ASEAN lenirtem senden Manila akar

Bhutan-i BBIN magizükteter



April 29, 2017 nü Pasay City, Philippines nung 30buba Association of Southeast Asian Nations (ASEAN) senden lapokba sentong nung Southeast Asia lenirtem teka amteper tangokba noksa yangi angur. Lenirtem Honibarnü nungi adenshia küm 50 tain, Association of Southeast Asian Nations (Asean)-i alima nung tebilemetsütem jenti adokba mapang ka nung kechi inyaksü iba tsütsü tebilemba rasaa jembiteptsü tebilemba nung adenshi.

Manila, April 29 (Agencies) : Southeast Asia nung lenirtem Honibarnü nungi adenshia küm 50 tain, Association of Southeast Asian Nations (Asean)-i alima nung tebilemetsütem jenti adokba mapang ka nung kechi inyaksü iba tsütsü tebilemba rasaa jembiteptsü. "Mendenpurtemi anir nübürtem taküm nung temelenshi bener arutsütsü asoshi Association of Southeast Asian Nations (Asean) tejangraba metetdaksütsü asoshi tanü adenshiogo," ta Philippine Tir, Rodrigo Duterte-i iba senden tenzütkba mezüng sentong nung

ashi. Asean nung züngsema aliba linüktemji Brunei, Cambodia, Indonesia, Laos, Malaysia, Myanmar, Philippines, Singapore, Thailand aser Vietnam lir, ta osang ajanga ashi. 30buba Asean senden ajunga nung Duterte meden asütsü aser Honibarnü lenir 10 kija senden amendanga paisa anitsü. Benshia aruba aser tang nungi tasen benoka benshiba security inyakyimtem ajanga Asean-i yimjung, security aser yimji yimjung asoshi inyakba tendanger, ta Duterte-i ashi. "Linüktem nung

r o n g s e n k e t t s ü n g tebilemetsütem aser terenlok tapu balala ajanga arok nükjidong nung tebilemetsü adoker," ta paisa ashi. Pai, Asean ya temesepba mozü nungi nüji telok ka asütsüla, ta kanga süoki ia ashi. Asean lenirtem tang ya tesem aser international tebilemetsütem tsütsü tebilemba lemsatepdar. Parnoki maritime security, nübürtem asoshi bilemba telok yangertsü, tesem nung yimjung bener arutsü aser tanaben yimji yimjung bener arutsü asoshi olemtep mapang agi. Iba senden tatemi Duterte-i menden melepzüng o jembitsü.

Ni Tir aküm nungbo Nicolas Ato Kilonser shimtsü:Le Pen

Paris, April 29 (Agencies) : French Front National (FN) nungi Tir atema toktepla candidate Marine Le Pen-i, la Tir aküm nungbo tan Tir election mezüng shilem nung tsüksang, candidate, Nicolas Dupont-Aignan la indang Ato Kilonser shimtsü, ta ashi. Arishi küm 48 tain, Le Pen-i aser Debout la France (Arise France) party lenir arishi küm 56 tain, Dupont-Aignan na külemi Paris nung osangbenertem den senden ka nung jembia liasü. April 23, 2017 nü Tir election mezüng shilem nung Dupont-Aignan-i jenjang trokbuba ngutet. Pai vote million 1.7 angu. Osangbenertem den jembiba

mapang lenir anaprongi ashiba agi, May 7, 2017 nü Le Pen-i Tir election nung takok ngua la Tir aküm nungbo Dupont-Aignan ji Le Pen atema Ato Kilonser shimtsü. Dupont-Aignan ya tesüiba mapang right-centre party Les Republicains nung lenir liasü. France nung aliba political party temi Le Pen'er party ya bendanger amai bilemer aser parnoki nübürtem anemer ta züngshia aliba mapang ka nung tan mezüngsüa tanga party ka den lokteper. "Nicolas Dupont-Aignan ya kanga dang bendanga agüja inyakba nisung ka aser linük asoshi nendaka inyakba nisung ka lir. Pai pa jangratema aliba

tesem toktsütsü tejangraba sayuogo, ta Le Pen-i ashi. Southeastern suburb, Paris Commune of Yerres nung mayor, Dupont-Aignan-i pa Le Pen den meputepba shiogo. Tena tsüngda rongsenkettsüng nung mangatettep liasü ta pai ashi. Ajisüaka tena tsüngda tebilemba ka kasa lir aser ibaji France meimba lir, ta paisa ashi. "France nunger ajaki asen linük kümzüka ayutsü asoshi longjemdi," ta Dupont-Aignan-i ayongzüük. Linük nung telemsa, kiralongraba aser ozüng alema inyakba nokdangtsü asoshi nükjidongser inyakba party nungi toktepla Le Pen-i, ano maneni kü pusemer adoktsü, ta ashi.

Kathmandu/Thimphu, April 29 (Agencies) : Bhutan-i Bangladesh, Bhutan, India, Nepal (BBIN) gari tenangzüktep (Motor Vehicle Agreement) magizükteter aser tanüngba linük asem dang parnok meteni iba maparen tenzütkang ta ashiba ajanga item linüktem koda masü kümdaktsür, ta osangbenertemi ashi. Bhutan-i iba osang ya Delhi nung aliba Nepal Embassy dang metetdaksü aser iba osangji ano Foreign Ministry nem memetetdaksü, ta Kathmandu osangkaket nung shia lir. Bhutan-i iba amalitep mapa toktsütsü lemtetba ajanga anünga aliba linük asema iba mapa kodaser takok angutsü ibaji atema lenmang kar patettsü nungdak. Ano iba maparen atema olemtep kecha magi lir, ta Foreign Ministry nung ketdangser tain kati ashi. "Ibai mapa akümtsü asoshi Bhutan meteni linük asem senteper telemtetba ka agitsü. Iba telemtetba agitsü asoshi India-i anitsüla," ta ketdangser jagisa ashi. Yaküm June ita tatemlen Bhutan yimtiba Thimphu nung South Asia linük pezüi BBIN tenangzüktep nung sign asü. Iba mesükba inyakyim ya South Asia nung ibai mezüngbuba lir. Iba tenangzüktep ajanga passenger, nija aser osettsüset abenba gari tem linük pezü prong nung senzütsü temelaba agütsür. Aji oda süaka, Bhutan ya linük tila asüba yong iba inyakyim nung tera timtem

alutsü ta ashir. Parliament-i agizükba sülen Bhutan-a iba telok nung adentsü, ta Bhutan osang ajanga ashi. Sorkari BBIN ya sabang ka amai agir. Iba sabang nung tashi, shishilemba, osangtsüsang, tongtepratep aser technology dena lir. Linük tanga den amalitepa inyakba tsütsü sendaktepba akümbaji Bhutan asoshi kanga tongtibang mapa ka lir, anungji Bhutan sorkari BBIN aser BBIN gari tenangzüktep asoshi teinyaktsü ka lir ta agir, ta Bhutan Foreign Ministry-i ashi. Linük asemibo iba tenangzüktep agizükogo, saka Bhutan-bo tangang iba mapa asoshi par linük sasep nung teinyaktepdak lir aser par soakari linük asema nungdakba ataloktsütsü merangdar. Iba tenangzüktep asoshi aruyaa aliba Parliament senden nung jembitsü. Opposition-ibo iba tenangzüktep menungiter, ta osang ajanga ashi. Ajisüaka Parliament-i iba tenangzüktep magizükra Bhutan rongsenkettsüng tsütsü maongka tajung magitettsü, ta sorkari ashir. BBIN ya 2015 küm tsüngküm mapang mezüngsüa National Assembly, Bhutan nung benok, ajisüaka 2016 meyi mapang tashi thinen. Ajisüaka ano 2016 November ita nung National Council-i iba inyakyim züktokadok. National Council telemtetbaji Bhutan nunger kangabo shia memetetertemi kanga sashia nungita liasü.



April 29, 2017 nü Cairo, Egypt nung tekülem anitsü asoshi Pope Francis tonga aruba noksa nung angur.

Myanmar-i par nija 'satellite system' yangluner

Nay Pyi Taw, April 29 (Agencies) : Myanmar-i par nija 'satellite system' yanglunsü sentong lir aser iba mapa asoshi tanir telok ka tentettsü, ta Honibarnü ketdangsertemi ashi. Iba mapa anitsü asoshi tentetba telokji linük Tatong Tir, U Myint Swe alitsü aser nungdakra par telok yagi Myanmar Space Agency atema inyaktsü. Iba den külemi parnoki International Telecommunications Union (ITU) aser tanga international teloki benshia aruba tetuyuba shitak nung ajemdaker

inyaktsü, ta osangbenertemi ashi. Ibai yangertsü asoshi nungdakba senotsüji 2018-19 nung latettsütsü. Myanmar nung Satellite amshiba mapa jenti akümer. Bank, totzü & gas, aser kaketshisatsü tem atema satellite balaka nungdaker, ta ketdangsertemi ashi. Satellite ajanga ali, tzü aser asetkong ajang nung tongtepratepteter. Iba den külemi ano Myanmar nung aliba yimtsütem aser asetkongtem den tongtepratep mapa nunga amshitettsü.



Iraq yimtiba Baghdad kübok Karrada district nung taküm bendanga agütsür kati bomb poklokja lendong agütsüba tesem nung Iraq security force aser civilian tem April 29, 2017 nü adenshia repringtepba noksa angur. Hokolbar nikongdang atalokba lendong nung tajemba agi nisung 5 asü aser nisung 10 yiru, ta police sangdong ka ajanga metetdaksü.

Nagaland nung...

(TAPAK 1 NUNGI...)

Sentong nung NSVC Vice President, Dr. Aomangyang Walling-i okila jembidang, veterinarian aser veterinary professional tem dena veterinary services nung inyaker ajaki shiruru nungi adokba tashidak azüoktsü atema inyaksüla, ta ashi.

"Asenoki antimicrobials amshiba ketdangsüa reprangtsüla aser aluyimer o shiruru metsürtem nem shisalen sayutsüla" ta paisa shisem.

Iba sentong nung Deputy Director (DMC) Dr. Inato Zhimomi nem 2017 küm atema 'Best Veterinarian' sempet agütsü.

Sentong nung mendenji NSVC President Dr. I. P. Khala liasü, NSVC Member, Dr. N. Rongsentemjen-i tesentepertem pelaa agizük, Dr. Simon Ao-i NSVC Act & Rules metetdaksü aser Nagaland Veterinarians' Association President Dr. Ilang-i anküp tepela o jembidi.

OFFICE OF THE
UNGMA SENSO MUNG DANG
UNGMA, MOKOKCHUNG, NAGALAND.
TENÜNGSANG AGÜTSÜR

Nagaland nung Wb. IMTIKUMZUK LONGKUMER Parliamentary Secretary (Information & Public Relations) jenjang ngutetba atema Ungma Senso Mungdangi tepela lemsateper aser tenüngsang agütsür.
Iba ama tangatetba tajung agi mapa tajung lemkütsüba atema Ungma Senso Mungdangi Wb. Shurhozellie Liezietsu, Chief Minister Nagaland aser Wb. T. R. Zeliang, Chairman, DAN na prongla dang pelaba metetdaksür.
Tsüngremi asen lenirtem moajangma ta sarasademtsür.

Sd/- (Takoyanger Tatar) President Ungma Senso Mungdang	Sd/- Dr. Rongsensosang Secretary Ungma Senso Mungdang
---	--

MELENSHITSÜR

Tir Yimyim adok 185, dated 25th April 2017 tapak 11 nung sangdonger ta ser Khutak Prayer Centre Longjang nung asüngsashi sentong atema sangdong agütsüba nung 'Kotak' ta alibaji Khutak ta melenshitsu.

Ano senso tejangrartem asoshi iba sentong nung arua adentsü ayongzüker.
Aibelenba atema sasa-a bilemer.

- K.P.C Longjang

PELABA LEMSATEPER

Ozü temeim tsürabur T.Sashi Changkiri ajungbena April 25, 2017 nü iba lima nungi pilar onok mangyim jashi nung alidang kija-kibong, arogo, lokti tentet, kidang-kiyongertem, tembar-adianutem aser temeimertem shirnokisa nübo, rongsen aser sarasadem agi onok dang meima yariogo, nenok ajak dang onoki kanga pelaba lemsateper.

Onok timtem mapang nenok temeim aser teyari ajanga tashi aser tesünep tulu nguogo. Onoki nenok nisung shia dang pelaba meshitetba atema sasar, ajisüaka Tulusang Tsüngremi nenok ajak talubosa moajangma ta sarasademtsür.

- Temeim kinungtsü, jala aser kinungertem.



AO SENSO TELONGJEM DIPHUPAR
celebrates
MOATSÜ
Asüng nükle nung lanü sebaliba jenjang
(Envisioning today's cultural values for tomorrow)

2nd MAY 2017
DIPHUPAR LOCAL GROUND | 11:00 AM
SENTONG LENIR
WB. LIMASUNEP IMCHEN & WT. AKANGTOLA

SARASADENTSÜ	: WB. N. LIPOK JAMIR PASTOR, ABCD
OKILA	: WB. LATONG PONGEN PRESIDENT, ASDD
TETSÜ TEBÜ KEN KA	: DIPHUPAR AOR OBALA TEM
TEPELA O	: I) WB. LIMASUNEP JAMIR IPS COMMISSIONER OF POLICE, DIMAPUR, NAGALAND
	: II) WB. LANUTOSHI PONGEN CHAIRMAN, DIPHUPAR VILLAGE COUNCIL
JILUSHI	: AD KAKETSHIR TELONGJEM DIPHUPAR
MOATSÜ RATET	: WB. N. TSÜKNUNG JAMIR
YAR TSÜNGSANG	: AD YOUTH FORUM DIPHUPAR
TAJUNGSHI O	: WB. S. I. JAMIR ADVISOR, URBAN DEVELOPMENT, GOVERNMENT OF NAGALAND
MELEPZÜNG O	: WB. A. AKUM LONGKUMER CONVENOR, PLANNING COMMITTEE
TATEM SARASADEM	: WT. ALEMLA IMCHEN ASSOCIATE PASTOR WOMEN, ABCD

MULUNGNEN O

ASO: 7th Nov 1924 ASÜ: 24th April 2017



Ozü tsürabur asür Sashimayang (Mangmetong), asükhu nung yimer-yimsanger, temba tinu ana aser talang nungi shirnokisa nübu, rongsen aser sarasadem agi yariogo, nenok ajak dang kanga pelar. Nenok sarasadem aser teyari ajanga ozü khuret aser mulungjang anisüngzükdaksür. Ozüi kija shia dangi arua tepela melemsatetaka, Tematiba Teyanglur aser Tulusang Tsüngremi nenok ajak moajangma.

- Temeim Kinungtsü, Chirnur, Secmhirtem aser Anükapang

OFFICE OF THE
AONOKPU SENSO MONGDANG
H.Q. AONOKPU
METETDAKTSÜR

Nagaland Post 21st April, 2017, Tir Yimyim 24th April adok nung Aonokpu Village Council-i May 3rd 2017 nu senso mongdang jazukbaji Aonokpu Senso Mongdang temzüng 9 (tuko)-i memelar. Anungji, iba Mongdang nung senso züngsem shinga madentsü metetdaksür.

Sd/- K. Tongbang Jamir President Aonokpu Senso Mongdang Camp, Dimapur	Sd/- Lipokmeren General secretary Aonokpu Senso Mongdang Camp, Dimapur
---	--

Vice president-ji agütsüra inyaksü... (TAPAK 1 NUNGI...)

Paisa election merüka agidaksünüba olen kar ashidang, "Nagaland ya Khristan lima, anungji, Khristantemi ochi angatetsüla, merüka alitsüla aser Tsüngrem angatetsüla", ta paisa ashi. "Kodang Tsüngremji angatetdir Pa sentongjia asenoki angatetsü kechiyong Tsüngremi tajung dang bilemer aser Khristanpur shiai peisasa angatetsüla", ta paisa shisem.

"Naga lima jungdi süra lanurtem lenla ajak nung asentenshi nungdaker, joko akhi otsü mejembitsüla saka tanü tensa den apet kechisarena ajak melenshitsu", ta paisa inyadaksünüba olen ka ashi.

Paisa Naga yimden tebilemstü onük dak sentakba kar lemsatepdang, "kü tebilembaji

kanga tejangja lir, Naga yimden tebilemstü ya yimden tebilemstü lir, kechiyong India nüjiso mangudang nungi Naga nungerji nüjiso meshia liasü", ta pai 'Simon Commission' indang tatishitsu bener arua ashi.

"Nagaland ya tanga state dang nungi khenyongi balaka lir, kechiyong Nagaland state akümba yabo yimden olemtep (political agreement) ajanga yangluba lir aser India nung iba ama tenzükbaji ibai mezüngbuba lir", ta Jamirisa ashi.

"Naga yimdenji bendangeri lemtetsü makok aser bendanger yimdenji Naga nungeri lemtetsü makok, Naga yimden tebilemstüji Naga nunger den jembitsüla aser iba jagi dang telemetbaji agitetsü", ta paisa kanga jangja ashi.

"Yimden kenoji merük-merüka lir asünung, joko mapang meindoki tarutsü Naga nunger koma aotsü ta asübaji dang jembitsüla", ta paisa shisem.

Narendra Modi-i aniba NDA sorkar indang metetnüa asüngdang, "nüburtemi parnok nem tashi ulura agüjadok, saka tashi nung lir ta sür pei inyaknütüsü ajak inyakbaji tim masü", ta pai ashi. NDA sorkar ya yimden onük (political agenda) dang masü saka tanga onük dena lir, anungji, minority atemabo lenmang sadema mangur, ta paisa tatalokba kuli kar densema ashi.

Pa ya Moatsü benjong amungi aruba lir aser May 3 nüji meyipa aotsü, ta osang ajanga angazüker.

[Pursuant to sub-section (1) and sub-section (4) of section 248 of the Companies Act, 2013 and second proviso to rule 7(1) of the Companies (Removal of Names of Companies from the Register of Companies) Rules, 2016]

GOVERNMENT OF INDIA
MINISTRY OF CORPORATE AFFAIRS
Office of the Registrar of Companies, North Eastern Region, Shillong
(Ground Floor, Morellow Building, Kachary Road, Shillong-793001, Meghalaya)

REFERENCE

Companies Act, 2013 kükok Section 248(1) nung shia aliba ama company-tem tenüng endoktsü atema tsünglanglen nungdaktem metetdaksür :

1. Registrar of Companies-i yangi iba link: http://www.mca.gov.in/MinistryV2/roc_shillong.html; nung shia aliba ama company-tem ya taoba küm ana tashi kecha mapa meinyak ta amangtsüsa kuli tejangja lir aser iba mapang Companies Act, 2013 kükok section 455 nung shia aliba ama dormant company status jenjang nung alitsü asoshia tasüngdanga masüngdang. Anungji, iba osang metetdaksüba sülen anogo semer nü tsüngda masüa ta kuli tejangja ka mesayutetra, item company-temji Companies Register nungi tenüng endoktsü mesüra anentsütsü asoshi shidanger.
2. Nisung kari danga company-tem tenüngji Company Register nungi endoktsübaji tim masü ta bilemra iba osang adoker anogo semer nü tsüngda yangi tekalen agüja aliba address dangi masüa ta asüba ken oji yoktsü metetdaksür.

(Chandan Kumar)

REGISTRAR OF COMPANIES, SHILLONG

5buba Frolic Cup 2017 KSU-i benogo



Tanü tembangba Frolic Cup 2017 asayamung nung takok angur telok, Khanakhurü Students' Union den asayamung ketdangsertem külemi tangokba noksa yangi angur. Parnoki final asaya nung 1-0 agi Kuki Youth Club madak takok angu.

Dimapur, April 29 (TYO) : Tanü tembangba, 5buba Frilic Cup 2017 asayamung nung Khanakhurü Students' Union-i takok marok nguogo aser parnok sülen Kuki Youth Club-i tanabuba jenjang nung takok angu, ta Frolic Club Tir, Kepe Nakhro aser Games & Sports Secretary Nizhalhu Kuotsu nati sangdong ka ajanga metetdaksü.

Iba telok ana ya tesüiba mapang iba asayamung nung asem tashi asayaogo.

Tenati ashiba agi, tanü anü kanga tatsü süaka Local Ground, Medziphema nung football janrartem jenti nikongdang 3:00 ako shitak nung adenshia iba final asaya repranga liasü.

Internet ajanga osang abener, Kaminlen-i ashiba agi, menur arurtembo tamentsü tesem maliasü anungji asaya tepiyong nokdaker reprang aser asaya tenzükli nungi telok ana pusemertem ola tulu adoka

jangrabangra reprangtep.

Kasa sangdong nung, asaya tenzükli nungi tajangshiba aika aliba telok, KSU-i ball kanga junga azioka asaya meso ase par telok nungi Rhitso asaya mezüing tesadang atemtsü anasa mezüing goal yok. Tanabuba tesadang nungbo KYCB-ia kanga junga asaya aser vall parnok ket nung dak timba amshi, ta shia lir.

KYC-i mapang aika nung goal yoktsü maongka tajung nguteta liasü. Parnoki corner aser free kick aika anguba saka goal aika terara agi meyokteti lia asaya tembang. Anungji iba final asaya nung KSU-i 1-0 agi takok ngua asayamung takok marok angu, ta sangdong ajanga ashi.

Sangdong ajangsa ashiba agi, tan asayamung nung takok angur telok nem senpet, sen 60,000 den kuli kaketter aser tanabuba jenjang nung takok angurtem nem sen 30,000 senpet den kuli kaketter

agütsü. Asayamung tepiyong nung Best midfielder, Khanakhurü Students' Union nungi Ninja; Best Defender, Molvom Youth & Students' Union nungi Temjenwati; Golden Gloves, Kuki Youth Club nungi Alemse; Golden Boot, Medziphema Village Youth Organisation nungi Shürhuosül aser Player of the Tournament, Kuki Youth Club nungi Nyithung nung nema senpet aser kuli kaketter agütsü.

Takokertem nem senpet ajak Tongti tesemdanger Dimapur DC, Kesonyü Yhome-i lemstü. Dimapur DC-i Frolic Club, Medziphema ajanga nisung ajak sabang kati anir arua kanga meranga aser bendanga inyakba asoshi tayongertem nem tenüngsang agütsü.

Kesonyü Yhome-i, tarutsü mapang nunga takok angutsü asoshi maneni asaya yimya tajung tang amai benshitsüla, ta asayartem ayonga liasü.

Yoddha Fighting Championship 2017 nung Imkong Jamir-i takok angu



YFC 2017 finale nung asayar ana raraba noksa nung angur

Dimapur, April 29 (TYO) : Yoddha Fighting Championship (YFC) 2017 Season one finale April 28, 2017 nü IG stadium, Kohima nung tenzükba April 29, 2017 nü tembangogo.

Iba asayamung ya Wise Guy Entertainment-i Department of Youth Resources & Sports den yaritepa ayongba lir aser anogo ananü asayaba Yoddha Fighting Championship nung India tesem

balala nungi nisung 54-i shilem agiogo.

Nagaland nungi asayar parnok pezüi final tashi tongtet aser parnok rongnung Imkong Jamir-i takok angu. Pa ya Mokokchung district kübok Kangtsüing nung lir aser pai featherweight (62 to 66kg) telesa nung takok ngua liasü.

Tanüingba Naga nung asayartenji welter weight telesa nung (71 nungi 77 kg) arishi küm

28 tain, Victor Angami, light telesa nung (67 nungi 70 kg) arishi küm 23 tain, Amung Konyak aser arishi küm Ketholetuo Nagi, Straw weight telesa nung (52 kg tekübok) liasü.

Tanü telesa balala nung final asayatem nung Victor-i Suyash Yadav den, Ketholetuo-i Sunny Khatri den aser Amung-i Rudransh Azad den asayadang tamakok angu.



APRIL 30, 2018 ASAYA

Punjab VS Delhi - 4:00 PM

Hyderabad VS Kolkata - 8:00 PM

APRIL 29, 2017 ASAYA OSANG

Pune-i runs 61 agi Bangalore akok.

Mumbai-i Super over nung Gujarat akok.

Rio-i Dimapur nung saisapong benjung lapoktsütsü

Dimapur, April 29 (TYO) : sentong nung nübur ajaki Dimapur nung tan mezüingsüa mepaidoki arua reprangtsü saisapong benjung ka, "Victor 1st

North-East Masters (Veteran) badminton championship" May 4 nungi 6, 2017 tashi Badminton Indoor stadium, United colony (Nagaran), Dimapur nung asayatsü.

Asemnü munga asayatsü aliba asayamung ya Nagaland Badminton Association kübok Dimapur District Badminton Association (DDBA)-i ayongtsü aser iba asayamung ya tesüiba mapang Nagaland Chief Minister aser tang Nagaland Lok Sabha, MP, Neiphiu Rio-i anepdang 9:00 ako nung lapoktsütsü.

Iba asayamung mapang stall balala lapoktsü aser item rongnung chiyongtsü tapu balala anguba stall den, art, holiday & leisure aser saisapong packages tem angutsü.

Iba den külemi nikongdang shia kentener telok balalai ken atentsü aser item rongnung DGP telok, DDBA telok, Renbeni Odyuo aser Sinya Kath nung den asaya menür Hopong Phom nung densema lir.

Tan mezüingsüa Dimapur nung iba asayamung tulu aser kenten benjung repa amunga

Ano jangratemtsü balaka kaji iba asayamung tatembangnü Arjuna award angusang aser international badminton asayar, Victor atema brand ambassador, Ashwini Ponnappa arutsü.

Iba sentong tulu ayongertemi ashiba agi, tan iba asayamung nung Nagaland dena north east state tem nungi badminton asayar nisung 100 dak temai tokteptsü osang jangaogo.


Iba asayamung nung senpet ajak senteper sen lakh 2.66 agütsütsü aser iba sen rangben den gift hamper temji Victor-i agütsütsü.

Badminton Association of India (BAI) Tir aer Minister of Finance, Health & Education, Govt of Assam, Dr. Himanta Biswas Sarma aser Nagaland Badminton Association (NBA) Tir aser Minister Roads & Bridges, Govt of Nagaland, Y. Vikheho Swu na iba asayamung shibangba sentong nung Tongti tesemdanger aser tetushi tejaoker alitsü.

Iba asayamung ya badminton ajanga Northeast state tem tsüingda temba akangshitsü nükjidong nung ayonger, ta asayamung ayongertemi ashi.

EVERYONE FEELS THE PAIN!

Oajm
CONTINENT
FAST RELIEF FROM PAIN



A Product of LIVSAV Group
CUSTOMER CARE:- 0250-6580183

BIEMDANGANG

"Nü sempet tila kaji tulu küma amshitsü merangtsüla."